

漢魏六朝百三家集

漢

劉子政

第陸冊

EAST ASIAN LIBRARY
RM 8049 ROBARTS LIBRARY
UNIVERSITY OF TORONTO
TORONTO, CANADA M5S 1A5

陸子題集

劉子政集

劉子政集題詞

漢膠侯劉路叔長者也頗脩黃老術
治淮南獄時得其枕中鴻寶苑秘書
子子政因而誦讀獻之人主鑄金不
成繫獄當死路叔上書頌罪亦遭吏
劾好奇賈禍誦白圭者且爲父咎云

元帝初立忠直輔政寺人譖愬復困
狂獄至今讀其封事忠愛憊怛義兼
詩書成帝尚支心嚮子政阨於王氏
不能大用連章讜言僅告無罪而已
夫屈原放廢始作離騷子政疾讒八
篇乃顯同姓忠精感慨相類左徒當

日諫書不傳彼蓋爭之口舌其著者
張儀一事耳子政苦口終身不倦年
餘七十惓惓漢宗感災異而論洪範
戒趙衛而傳列女鑒往古而著新序
說苑其書皆非無爲而作者也雖九
嘆深雅微謝騷經其他文詞宏博足

相當矣太史公屈原傳云原死後楚
日削竟爲秦滅孟堅亦云子政卒後
十三歲王氏代漢此兩人係社稷輕
重何如哉

婁東張溥題

漢劉子政集目錄

賦

請雨華山賦

疏

理甘延壽陳湯疏

諫營起昌陵疏

論星孛山崩疏

說成帝興禮樂

諫成帝

上書

使人上變事書

封事

條災異封事

極諫外家封事

議

祔寶舊時議

對

日食對

頌

高祖頌

銘

杖銘

薰爐銘

序

上戰國策序

上關尹子

上晏子

上子華子

上列子

上於陵子

孫卿子後序

騷

尤歎

逢紛

靈懷

離世

怨思

遠逝

惜賢

憂苦

愍命

思古

傳

洪範五行傳

附錄

本傳

劉子政集目錄終

漢劉子政集卷全

漢 劉向子政 著

明 張溥西銘 閱

賦

請雨華山賦

崆嶺巍靖嶢山清忽幽昧徃曲勃林岑茱崔一作

崔竭離安連迎崍通谷曼服愧登草均阿阪殷

紛聲沸路遼遠調修倅嶢寒服嶼冥冥蘭蔓散

峽靖靖休休溱溱路黍稷雲嶢忽傳天下為深

壑旅請今深渥水谷密請宜令所出百鎗鎗清
池涌泉淡州鳴鶩翔唼唼殊侶診賞懸若神悲
哀但往不可語人鹿麋麋麋休他他野牛勝握
觸熊螫螫律怒佛特林旅象犀庸遊山陵天陰
且雨員日聆棠柘梓桐樛梢母猴猿木戲手相
持睠陽趨芬若風時憚鴛飄陽鸞孔翠文章明
豎曠苑食游山旁毘蠃狐貉臨水凝渾兮不觸
果必方蓋格可爲毘陵鯉難神龜春夏出游冬
自根聖人親之誠虞哉號拖何不可勝亦路臨

何爲華山

劉子文集

卷八

賦

七

聖訓正集

卷全

二

疏

劉更生理甘延壽陳湯疏

是時石顯匡衡以延壽湯矯制生事於蠻夷幸得不誅不宜復加爵土上重違其議而內嘉湯等功議久不決向上疏元帝於是詔議封

郅支單于囚殺使者吏士以百數事暴揚外國傷威毀重群臣皆閔焉陛下赫然欲誅之意未嘗有忘西域都護延壽副校尉湯承聖指倚神靈總百蠻之君。搃城郭之兵。出百死。入絕域。遂蹈康居。屠五重城。舉歙侯之旗。斬郅支之首。縣

旌萬里之外。揚威昆山之西。埽谷吉之耻。立昭明之功。萬夷懼伏。莫不懼震。呼韓邪單于見郅支已誅。且喜且懼。鄉風馳義。稽首來賓。願守北藩。累世稱臣。立千載之功。建萬世之安。群臣之勲莫大焉。昔周大夫方叔吉甫爲宣王誅獫狁而百蠻從。其詩曰。嘽嘽焞焞。如霆如雷。顯允方叔。征伐獫狁。蠻荆來威。易曰。有嘉折首。獲非其醜。言美誅首惡之人。而諸不順者皆來從也。今延壽湯所誅震雖易之折首。詩之雷霆。不能及。

也。論大功者不錄小過。舉大美者不疵細瑕。司馬法曰。軍賞不踰月。欲民速得爲善之利也。蓋急武功重用人也。吉甫之歸。周厚賜之。其詩曰。吉甫宴喜。旣多受祉。來歸自鎬。我行永久。千里之鎬。猶以爲遠。況萬里之外。其勤至矣。延壽湯旣未獲受祉之報。反屈捐命之功。久挫于刀筆之前。非所以勸有功。厲戎士也。昔齊桓公前有尊周之功。後有滅項之罪。君子以功覆過而爲之諱行事。貳師將軍李廣利捐五萬之師。靡億萬

之費經四年之勞而僅獲駿馬三十匹。雖斬宛王毋鼓之首。猶不足以復費。其私罪惡甚多。孝武以爲萬里征伐。不錄其過。遂封拜兩侯三卿二千石。百有餘人。今康居國强于大宛。郅支之號重於宛。王殺使者。罪甚於留馬。而延壽湯不煩漢士。不費斗糧。比於貳師。功德百之。且常惠隨欲擊之。烏孫鄭吉迎自來之日。逐猶皆裂土受爵。故言威武勤勞。則大於方叔。前列功。覆過則優於齊桓。貳師近事之功。則高於安遠。長

羅而大功未著。小惡數布。臣竊痛之。宜以時解縣通籍。除過勿治。尊寵爵位。以勸有功。

諫營起昌陵疏

更生坐廢十餘年。成帝卽位。顯伏辜更生。乃復進用。更名向。故九卿召拜爲中郎。領護三輔都水。久之。營起昌陵。數年不成。復還歸延陵。制度泰奢。向上疏諫。上感其言。而不能從。

臣聞易曰。安不忘危。存不忘亡。是以身安而國家可保也。故聖賢之君。博觀終始。窮極事情。而是非分明。王者必通三統。明天命所授者博。非

獨一姓也。孔子論詩。至於殷士。膚斂裸。將于京。喟然歎曰。大哉天命。善不可不傳於子孫。是以富貴無常。不如是則王公其何以戒慎。民萌何以勸勉。蓋傷微子之事周而痛殷之亡也。雖有堯舜之聖。不能化丹朱之子。雖有禹湯之德。不能訓末孫之桀紂。自古及今。未有不亾之國也。昔高皇帝旣滅秦。將都雒陽。感寤劉敬之言。自以德不及周。而賢于秦。遂徙都關中。依周之德。因秦之阻。世之長短。以德爲效。故常戰栗不敢。

諱亡孔子所謂富貴無常。蓋謂此也。孝文皇帝
居霸陵、北臨廁、意悽愴悲懷、顧謂群臣曰、嗟乎
以北山石爲槨、用紵絮斲陳漆其間、豈可動哉。
張釋之進曰、使其中有可欲、雖錮南山猶有隙、
使其中無可欲、雖無石槨、又何感焉。夫死者無
終極、而國家有廢興、故釋之之言、爲無窮計也。
孝文寤焉、遂薄葬、不起山墳。易曰、古之葬者、厚
衣之以薪、葬之中野、不封不樹、後世聖人易之、
以棺槨、棺槨之作、自黃帝始。黃帝葬于橋山、堯

葬濟陰。邱壠皆小。葬且甚微。舜葬蒼梧。二妃不從。禹葬會稽。不改其列。殷湯無葬處。文武周公葬于畢。秦穆公葬于雍橐泉宮。祈年館下。樗里子葬于武庫。皆無邱壠之處。此聖帝明王。賢君智士。遠覽歎慮。無窮之計也。其賢臣孝子。亦承命順意而薄葬之。此誠奉安君父。忠孝之至也。夫周公武王弟也。葬兄甚微。孔子葬母于防。稱古墓而不墳。曰邱。東西南北之人。也不可不識也。爲四尺墳。遇雨而崩。弟子修之。以告孔子。孔

子流涕曰。吾聞之。古者不修墓。蓋非之也。延陵季子適齊而反。其子死。葬于贏博之間。穿不及泉。歛以時服。封墳掩坎。其高可隱而號。曰。骨肉復歸於土。命也。魂氣則無不之也。夫贏博去吳千有餘里。季子不歸葬。孔子往觀之。曰。延陵季子於禮合矣。故仲尼孝子。而延陵慈父。舜禹忠臣。周公弟弟。其葬君親骨肉。皆微薄矣。非苟爲儉。誠便於體也。宋桓司馬爲石槨。仲尼曰。不如速朽。秦相呂不韋集智略之士。而造春秋。亦言

薄葬之義。皆明於事情者也。逮至吳王闔閭。違禮厚葬。十有餘年。越人發之。及秦惠文武昭嚴襄五王。皆大作邱壠。多其瘞藏。咸盡發掘。暴露甚足悲也。秦始皇帝。塋於驪山之阿。下錮三泉。上崇山墳。其高五十餘丈。周迴五里有餘。石椁爲游館。人膏爲燈燭。水銀爲江海。黃金爲鳧鴈。珍寶之藏。機械之變。棺槨之麗。宮館之盛。不可勝原。又多殺官人。生薶工匠。計以萬數。天下苦其役而反之。驪山之作未成。而周章百萬之師。

至其下矣。項籍燔其宮室營宇。徃者咸見發掘。其後牧兒亡羊。羊入其鑿。牧者持火照求羊。失火燒其藏椁。自古及今。葬未有盛如始皇者也。數年之間。外被項籍之災。內罹牧豎之禍。豈不哀哉。是故德彌厚者。葬彌薄。知愈深者。葬愈微。無德寡知。其葬愈厚。邱隴彌高。宮廟其麗。發掘必速。由是觀之。明暗之效。葬之吉凶。昭然可見矣。周德旣衰而奢侈。宣王賢而中興。更爲儉宮室。小寢廟。詩人美之。斯干之詩是也。上章道宮

室之如制。下章言子孫之衆多也。及魯嚴公刻飾宗廟。多築臺囿。後嗣再絕。春秋刺焉。周宣如彼而昌。秦魯如此而絕。是則奢儉之得失也。陛下卽位。躬親節儉。始營初陵。其制約小。天下莫不稱賢明。及徙昌陵。增庫爲高。積土爲山。發民墳墓。積以萬數。營起邑居。期日迫卒。工費大萬百餘。死者恨于下。生者愁於上。怨氣感動陰陽。因之以饑饉。物故流離。以十萬數。臣甚惜焉。以死者爲有知。發人之墓。其害多矣。若其無知。又

安用大。謀之賢知則不說。以示衆庶則苦之。老
苟以說愚夫淫侈之人。又何爲哉。陛下慈仁篤
美甚厚。聰明疏達。蓋世宜弘。漢家之德。崇劉氏
之美。光昭五帝三王。而顧與暴秦亂君競爲奢
侈。比方邱隴。說愚夫之目。隆一時之觀。違賢知
之心。亡萬世之安。臣竊爲陛下羞之。唯陛下上
覽明聖。黃帝堯舜禹湯文武周公仲尼之制。下
觀賢知。穆公延陵。樗里張釋之之意。孝文皇帝
去墳薄葬。以儉安神。可以爲則。秦昭始皇增山

厚藏以侈生害。足以爲戒。初陵之撫。宜從公卿大臣之議。以息衆庶。

論星孛山崩疏

向廉靖樂道、積思經術、晝誦書傳、夜觀星宿、或不寐達旦、元延中星孛東井、蜀郡岷山崩壅江、向惡此異、復上疏、上輒入之、然終不能用也、

臣聞帝舜戒伯禹毋若丹朱敖。周公戒成王毋若殷王紂。詩曰。殷鑒不遠。在夏后之世。亦言湯以桀爲戒也。聖帝明王。常以敗亂自戒。不諱廢興。故臣敢極陳其愚。唯陛下留神察焉。謹案春

秋二百四十二年。日食三十六。襄公尤數。率三
歲五月有奇而壹食。漢興訖。竟甯孝景帝尤數。
率三歲一月而一食。臣向前數言日當食。今連
三年比食。自建始以來。二十歲間而八食。率二
歲六月而一發。古今罕有。異有大小希稠。占有
舒疾緩急。而聖人所以斷疑也。易曰。觀乎天文
以察時變。昔孔子對魯哀公。竝言夏桀殷紂暴
虐天下。故厯失則攝提失方。孟陬無紀。此皆易
姓之變也。秦始皇之末。至二世時。日月薄食山

陵淪亡。辰星出於四孟。太白經天而行。無雲而雷。柱矢夜光。熒惑襲月。孽火燒宮。野禽戲廷。都門內崩。長人見臨洮。石隕于東郡。星孛大角。大角以亡。觀孔子之言。考暴秦之異。天命信可畏也。及項籍之敗。亦孛大角。漢之入秦。五星聚于東井。得天下之象也。孝惠時有雨血。日食於衝。滅光星見之異。孝昭時有泰山卧石自立。上林僵柳復起。大星如月西行。衆星隨之。此爲特異。孝宣興起之表。天狗夾漢而西。久陰不雨者二。

十餘日。昌邑不終之異也。皆著於漢紀。觀秦漢之易世。覽惠昭之無後。察昌邑之不終。視孝宣之紹起天之去就。豈不昭昭然哉。高宗成王亦有雉雉拔木之變。能思其故。故高宗有百年之福。成王有復風之報。神明之應。應若影響。世所同聞也。臣幸得託末屬。誠見陛下寬明之德。冀銷大異。而興高宗成王之聲。以崇劉氏。故懇懇數奸死亡之誅。今日食尤屢星孛東井。攝提炎及紫宮。有識長老。莫不震動。此變之大者也。其

事難一二記。故易曰。書不盡言。言不盡意。是以說卦指爻而復說義。書曰。佯來以圖。天文難以相曉。臣雖圖上。猶須口說。然後可知。願賜清燕之閒。指圖陳狀。

說成帝興禮樂

興辟雍。設庠序。陳禮樂。隆雅頌之聲。盛揖讓之容。以風化天下。如此而不治者。未之有也。或曰。不能具禮。禮以養人爲本。如有過差。是過而養人也。刑罰之過。或至死傷。今之刑。非臯陶之法。

也。而有司請定法。削則削。筆則筆。救時務也。至於禮樂。則曰不敢。是敢于殺人。不敢於養人也。爲其俎豆管絃之間。小不備。因是絕而不爲。是去小不備。而就大不備。大不備。惑莫甚焉。夫教化之比于刑法。刑法輕。是舍所重而急所輕也。且教化所恃以爲治也。刑法所以助治也。今廢所恃而獨立其所助。非所以致太平也。自京師有諄逆不順之子孫。至于陷大辟。受刑戮者。不絕。繇不習五常之道也。夫承千歲之衰周。繼暴

秦之餘敝。民漸漬惡俗。貪饕險詖。不閑義理。不示以大化。而獨毆以刑罰。終已不改。故曰導之以禮樂而民和睦。初叔孫通將制定禮儀。見非于齊魯之士。然卒爲漢儒宗。業垂後嗣。斯成法也。

諫成帝

聖人卽天地以耀物。常無私於上。均恩澤於下。協和萬邦。黎民無怨。用能隆興。肩嗣與天無窮也。

上書

使人上變事書

元帝初卽位、太傅蕭望之、少傅周堪並
領尚書事、薦更生、忠直明經、有行、擢爲
散騎宗正、給事中、與侍中金敞、四人同
心輔政。時苦外戚、許史放縱、宦官弘恭、
石顯弄權、望之堪、更生議欲白罷退之。
未白而語泄、爲所譖毀、堪更生下獄、及
望之免官。春地震、上感悟、賜望之爵關
內侯。秋徵堪向、欲以爲諫大夫。恭顯白
皆爲中郎、冬地復震、恭顯許史子弟皆
側目於望之等、更生懼焉、乃使其外戚
上變事書奏、恭顯疑更生所爲、白請考
姦、辭服、遂逮繫。下太傅韋玄成等劾免
爲庶人、而望之坐傳子上書訟冤、令詣
獄置對、自殺。天子甚悼恨之、擢堪爲光

祿勲堪弟子猛爲光祿大夫見信任更生見二人在位幾已得復進然懼其傾危乃上封事條災異以諫恭顯見其書愈與許史比而怨更生等

竊聞故前將軍蕭望之等皆忠正無私欲致大治忤於貴戚尚書今道路人聞望之等復進以爲且復見毀讒必曰嘗有過之臣不宜復用是大不然臣聞春秋地震爲在位執政太盛也不爲三獨夫動亦已明矣且往者高皇帝時季布有罪至於夷滅後赦以爲將軍高后孝文之間卒爲名臣孝武帝時兒寬有重罪繫按道侯韓

說諫曰前吾邱壽王死。陛下至今恨之。今殺寬。後將復大恨矣。上感其言。遂貰寬復用之。位至御史大夫。御史大夫未有及寬者也。及董仲舒坐私爲災異書。主父偃取奏之。下吏罪至不道。幸蒙不誅。復爲大中大夫膠西相。以老病免歸。漢有所欲興。常有詔問仲舒爲世儒宗。定議有益天下。孝宣皇帝時。夏侯勝坐誹謗。繫獄三年。免爲庶人。宣帝復用勝至長信少府太子太傅。名敢直言。天下美之。若乃群臣多此比類。難一

二○記○有○過○之○臣○無○負○國○家○有○益○天○下○此○四○臣○者○
足○以○觀○矣○前○弘○恭○奏○望○之○等○獄○決○三○月○地○大○震○
恭○移○病○出○後○復○視○事○天○陰○雨○雪○由○是○言○之○地○動○
殆○爲○恭○等○臣○愚○以○爲○宜○退○恭○顯○以○章○蔽○善○之○罰○
進○望○之○等○以○通○賢○者○之○路○如○此○太○平○之○門○開○災○
異○之○原○塞○矣○

封事

條災異封事

臣前牢得以骨肉備九卿奉法不謹乃復蒙恩竊見災異並起天地失常徵表爲國欲終不言念忠臣雖在明畝猶不忘君惓惓之義也况重以骨肉之親又加以舊恩未報乎欲竭愚誠又恐越職然惟二恩未報忠臣之義一抒愚意退就農畝死無所恨臣聞舜命九官濟濟相讓和之至也衆賢和於朝則萬物和於野故蕭韶九

成。而鳳凰來儀。擊石拊石。百獸率舞。四海之內。
靡不和甯。及至周文。開基西郊。雜遝衆賢。罔不。
肅和。崇推讓之風。以銷分爭之訟。文王既沒。周。
公思慕。歌詠文王之德。其詩曰。於穆清廟。肅雍。
顯相。濟濟多士。秉文之德。當此之時。武王周公。
繼政。朝臣成於內。萬國驩于外。故盡得其驩心。
以事其先祖。其詩曰。有來雍雍。至止肅肅。相維。
辟公。天子穆穆。言四方皆以和來也。諸侯和于。
下。天應報于上。周頌曰。降福穰穰。又曰。飴我釐。

莛、釐、莛、麥也。始自天降。此皆以和致和。獲天助也。下至幽厲之際。朝廷不和。轉相非怨。詩人疾而憂之。曰。民之無良。相怨一方。衆小在位。而從邪議。歛歛相是。而背君子。故其詩曰。歛歛訛訛。亦孔之哀。謀之其臧。則具是違。謀之不臧。則具是依。君子獨處守正。不撓衆枉。勉彊以從王事。則反見憎。毒讒愬。故其詩曰。密勿從事。不敢告勞。無罪無辜。讒口啓啓。當是之時。日月薄蝕。而無光。其詩曰。朔日辛卯。日有蝕之。亦孔之醜。又

曰彼月而微、此日而微、今此下民亦孔之哀、又
曰日月鞠凶、不用其行、四國無政、不用其良、天
變見于上、地變動于下、水泉沸騰、山谷易處、其
詩曰百川沸騰、山冢卒崩、高岸爲谷、深谷爲陵、
哀今之人、胡憯莫懲、霜降失節、不以其時、其詩
曰正月繁霜、我心憂傷、民之訛言、亦孔之將、言
民以是爲非、甚衆大也、此皆不和、賢不肖易位
之所致也、自此之後、天下大亂、篡殺殃禍竝作、
厲王奔彘、幽王見殺、至乎平王末年、魯隱之始

卽位也。周大夫祭伯乖離不和。出奔于魯。而春秋爲諱不言來奔。傷其禍殃自此始也。是後尹氏世卿而專恣。諸侯背畔而不朝。周室卑微。二百四十二年之間。日食三十六。地震五。山林崩。隄二。彗星三見。夜常星不見。夜中星隕如雨。一。火災十四。長狄入三國。五石隕墜。六鵠退飛。多麋有蜮蜚鸛鵒來巢者皆一見。晝冥晦。雨木冰。李梅冬實。七月霜降。草木不死。八月殺菽。大雨雹。雨雪霰霆失序相乘。水旱饑螽蝻螟螣午竝。

起。當是時禍亂輒應弑君三十六亡國五十二。諸侯奔走。不得保其社稷者。不可勝數也。周室多禍。晉敗其師於貿戎。伐其郊。鄭傷桓王。戎執其使。衛侯朔召不往。齊逆命而助朔。五大夫爭權。二君更立。莫能正理。遂至陵夷。不能復興。由此觀之。和氣致祥。乖氣致異。祥多者其國安。異衆者其國危。天地之常經。古今之通義也。今陛下下開三代之業。招文學之士。優游寬容。使得竝進。今賢不肖渾殽。白黑不分。邪正雜糅。忠讒竝

進章交公車。人滿北軍。朝臣舛午。膠戾乖刺。更相讒愬。轉相是非。傳授增加。文書紛糾。前後錯謬。毀譽渾亂。所以營惑耳目。感移心意。不可勝載。分曹爲黨。徃徃群朋。將同心以陷正臣。正臣進者。治之表也。正臣陷者。亂之機也。乘治亂之機。未知孰任。而災異數見。此臣所以寒心者也。夫乘權藉勢之人。子弟鱗集於朝。羽翼陰附者衆。輜輳于前。毀譽將必用。以終乖離之咎。是以日月無光。雪霜夏隕。海水沸出。陵谷易處。列星

失行。皆怨氣之所致也。夫遵衰周之軌迹。循詩人之所刺。而欲以成太平。致雅頌。猶卻行而求及前人也。初元以來六年矣。按春秋六年之中。災異未有稠如今者也。夫有春秋之異。無孔子之救。猶不能解紛。況甚於春秋乎。原其所以然者。讒邪竝進也。讒邪之所以竝進者。由上多疑。心既已用賢人而行善政。如或譖之。則賢人退。而善政還。夫執狐疑之心者。來讒賊之口。持不斷之意者。開羣枉之門。讒邪進則衆賢退。羣枉

盛則正士消。故易有否泰。小人道長。君子道消。君子道消。則政日亂。故爲否。否者閉而亂也。君子道長。小人道消。則政日治。故爲泰。泰者通而治也。詩又云。雨雪麋麋。見睨聿消。與易同義。昔者鯀共工驩兜與舜禹雜處堯朝。周公與管蔡竝居周位。當是時。迭進相毀。流言相謗。豈可勝道哉。帝堯成王能賢舜禹周公。而消共工管蔡。故以大治。榮華至今。孔子與季孟偕仕於魯。李斯與叔孫俱宦於秦。定公始皇賢季

孟李斯而消孔子叔孫故以大亂汚辱至今故
治亂榮辱之端在所信任信任既賢在于堅固
而不移詩云我心匪石不可轉也言守善篤也
易曰渙汗其大號言號令如汗汗出而不反者
也今出善令未能踰時而反是反汗也用賢未
能三旬而退是轉石也論語曰見不善如探湯
今二府奏佞調不當在位厯年而不去故出令
則如反汗用賢則如轉石去佞則如拔山如此
望陰陽之調不亦難乎是以群小窺見間隙緣

飾文字巧言醜詆流言飛文譁於民間故詩云
憂心悄悄愠于羣小小人成羣誠足恤也昔孔
子與顏淵子貢更相稱譽不爲朋黨禹稷與皋
陶傳相汲引不爲比周何則忠於爲國無邪心
也故賢人在上位則引其類而聚之於朝易曰
飛龍在天大人聚也在下位則思與其類俱進
易曰拔茅茹以其彙征吉在上則引其類在下
則推其類故湯用伊尹不仁者遠而衆賢至類
相致也今佞邪與賢臣竝在交戟之內合黨共

謀。違善依惡。歛歛訛訛。數設危險之言。欲以傾
移主上。如忽然用之。此天地之所以先戒。災異
之所以重至者也。自古聖明。未。有。無。誅。而。治。者。
也。故舜有四族之罰。而孔子有兩觀之誅。然後
聖化可得而行也。今以陛下明知誠深思天地
之心。迹察兩觀之誅。覽否泰之卦。觀雨雪之詩。
厯周唐之所進以爲法。原秦魯之所消以爲戒。
考祥應之福。省災異之禍。以揆當世之變。放遠
佞邪之黨。壞散險詖之衆。杜閉群枉之門。廣開

衆正之路。決斷狐疑。分別猶豫。使是非炳然。可知。則百異消滅。而衆祥竝至。太平之基。萬世之利也。臣幸得託肺腑。誠見陰陽不調。不敢不通所聞。竊推春秋災異。以效今事一二。條其所以不宜宣泄。臣謹重封昧死上。

極諫外家封事

時上無繼嗣。政由王氏。災變浸甚。向謂外家日盛。其漸必危。劉氏身爲宗室。遺老。歷事三主。遂上封事。極諫書奏。召見向。歎息悲傷其意。以向爲中壘校尉。上數欲用爲九卿。以王氏故終不遷。居列大夫三十餘年。卒後十三歲。而王氏代。

封事

漢

臣聞人君莫不欲安。然而常危。莫不欲存。然而常亡。失御臣之術也。夫大臣操權柄。持國政。未有不爲害者也。昔晉有六卿。齊有田崔。衛有孫甯。魯有季孟。常掌國事。世執朝柄。終後田氏取齊。六卿分晉。崔杼弑其君光。孫林父甯殖出其君衎。弑其君剽。季氏八佾舞于庭。三家者以雍徹。竝專國政。卒逐昭公。周大夫尹氏筦朝事。濁亂王室。子朝子猛更立。連年乃定。故經曰。王室

亂。又曰尹氏殺王子克甚之也。春秋舉成敗錄禍福如此類甚衆。皆陰盛而陽微。下失臣道之所致也。故書曰。臣之有作威作福。害于而家。凶于而國。孔子曰。祿去公室。政逮大夫。危亡之兆。秦昭王舅穰侯及涇陽葉陽君。專國擅勢。上假太后之威。三人者。權重於昭王。家富於秦國。國甚危殆。賴寤范雎之言。而秦復存。二世委任趙高。專權自恣。壅蔽大臣。終有閹樂望夷之禍。秦遂以亡。近事不遠。卽漢所代也。漢興。諸呂無道。

擅相尊王。呂產呂祿。席太后之寵。據將相之位。兼南北軍之衆。擁梁趙王之尊。驕盈無厭。欲危劉氏。賴忠正大臣絳侯朱虛侯等。竭誠盡節。以誅滅之。然後劉氏復安。今王氏一姓。乘朱輪華轂者二十三人。青紫貂蟬。充盈幄內。魚鱗左右。大將軍秉事用權。五侯驕奢僭盛。竝作威福。擊斷自恣。行汙而寄治。身私而託公。依東宮之尊。假甥舅之親。以爲威重。尚書九卿。州牧郡守。皆出其門。筦執樞機。朋黨比周。稱譽者登進。忤恨

者誅傷。游談者助之說。執政者爲之言。排擯宗室。孤弱公族。其有智能者。尤非毀而不進。遠絕宗室之任。不令得給事朝省。恐其與已分權。數稱燕王蓋主。以疑上心。避諱呂霍而弗肯稱。內有管蔡之萌。外假周公之論。兄弟據重。宗族磐互。歷上古至秦漢。外戚僭貴。未有如王氏者也。雖周皇甫秦穰侯漢武安呂霍上官之屬。皆不及也。物盛必有非常之變。先見爲其人微象。孝昭帝時。冠石立于泰山。仆柳起于上林。而孝宣

帝卽位。今王氏先祖墳墓在濟南者。其梓柱生
枝葉。扶疏上出屋。根垂地中。雖立石起柳。無以
過此之明也。事執不兩大。王氏與劉氏亦且不
竝立。如下有泰山之安。則上有累卵之危。陛下
爲人子。孫守持宗廟。而令國祚移于外戚。降爲
皁隸。縱不爲身。奈宗廟何。婦人內夫家。外父母
家。此亦非皇太后之福也。孝宣皇帝不與舅平
昌樂昌侯權。所以全安之也。夫明者起福於無
形。銷患於未然。宜發明詔。吐德音。援近宗室。親

而納信。黜遠外戚。毋授以政。皆罷令就第。以則效先帝之所行。厚安外戚。全其宗族。誠東宮之意。外家之福也。王氏永存。保其爵祿。劉氏長安。不失社稷。所以褒睦外內之姓。子子孫孫。無疆之計也。如不行此策。田氏復見於今。六卿必起於漢。爲後嗣憂。昭昭甚明。不可不深圖。不可不蚤慮。易曰。君不密則失臣。臣不密則失身。幾事不密則害成。唯陛下深留聖思。審固幾密。覽往事之戒。以折中取信。居萬安之實用。保宗廟久。

承皇太后天下幸甚

議

神寶舊時議

明年匡衡坐事免官爵。眾庶多言不當變動祭祀者。初罷甘泉泰畤。作南郊日大風。壞甘泉竹宮。折拔樹木十圍以上百餘。上以問劉向。向對上意恨之。後以

久無繼嗣。遂並脩復。

家人尚不欲絕種祠。况於國之神寶舊時。且甘

泉汾陰及雍五畤始立。皆有神祇感應。然後營之。非苟而已也。武宣之世。奉此三神。禮敬敕備。神光尤著。祖宗所立神祇舊位。誠未易動。及陳

寶祠自秦文公至今七百餘歲矣。漢興，世世常來，光色赤黃，長四五丈，直祠而息，音聲砰隱，野雞皆雊。每見雍太祝祠以太牢，遣候者乘傳馳請行在所，以爲福祥。高祖時五來，文帝二十六來，武帝七十五來，宣帝二十五來，初元元年以來亦二十來。此陽氣舊祠也。及漢宗廟之禮，不得擅議，皆祖宗之君與賢臣所共定。古今異制，經無明文，至尊至重，難以疑說。正也。前始納貢禹之議，後人相因，多所動搖。易大傳曰：「誣神者。」

殃及三世恐其咎不獨止禹等

日食對

河平元年四月己亥晦日有食之不盡如鉤在東井六度向對

四月交於五月月同孝惠曰同孝昭東井京師地且旣其占恐害繼嗣

鑑子正身

卷全

三

卷全

頌

高祖頌

漢帝本系出自唐帝降及於周在秦作劉涉魏而東爲豐公

[illegible]

銘

杖銘

一作崔瑗御覽
摘作馮植恐誤

厯危乘險。匪杖不行。年耆力竭。匪杖不彊。有杖
不任。顛跌誰怨。有士不用。害何足言。都蔗雖甘
殆不可杖。佞人悅已。亦不可相。杖必取便。不必
用味。士必任賢。何必取貴。

薰爐銘

嘉此正器。嚙巖若山。上貫太華。承以銅盤。中有
蘭綺。朱火青煙。

卷之五

卷全

五

序

上戰國策叙

護左都水使者光祿大夫臣向言所校中戰國策書中書餘卷錯亂相糅莒又有國別者八篇少不足臣向因國別者略以時次之分別不以序者以相補除復重得三十三篇本字多誤脫爲半字以趙爲肖以齊爲立如此字者多中書本號或曰國策或曰國事或曰短長或曰事語或曰長書或曰脩書臣向以爲戰國時游士輔

所用之國爲之策謀宜爲戰國策其事繼春秋
以後訖楚漢之起二百四十五年間之事皆定
以殺青書可繕寫叙曰周室自文武始興崇道
德隆禮義設辟雍泮宮庠序之教陳禮樂絃歌
移風之化叙人倫正夫婦天下莫不曉然論孝
弟之義惇篤之行故仁義之道滿乎天下卒致
之刑措四十餘年遠方慕義莫不賓服雅頌歌
詠以思其德下及康昭之後雖有衰德其綱紀
尚明及春秋時已四五百載矣然其餘業遺烈

流而未滅。五霸之起。尊事周室。五霸之後。時君
雖無德。人臣輔其君者。若鄭之子產。晉之叔向。
齊之晏嬰。挾君輔政。以竝立於中國。猶以義相
支持。歌說以相感。聘覲以相交。期會以相一。盟
誓以相救。天子之命。猶有所行。會享之國。猶有
所耻。小國得有所依。百姓得有所息。故孔子曰。
能以禮讓爲國乎。何有。周之流化。豈不大哉。及
春秋之後。衆賢輔國者旣沒。而禮義衰矣。孔子
雖論詩書。定禮樂。王道粲然分明。以匹夫無勢。

化○之○者○七○十○二○人○而○已○皆○天○下○之○俊○也○時○君○莫○
尚○之○是○以○王○道○遂○用○不○興○故○曰○非○威○不○立○非○勢○
不○行○仲○尼○既○沒○之○後○田○氏○取○齊○六○卿○分○晉○道○德○
大○廢○上○下○失○序○至○秦○孝○公○捐○禮○讓○而○貴○爭○戰○棄○
仁○義○而○用○詐○譎○苟○以○取○強○而○已○矣○夫○篡○盜○之○人○
列○爲○侯○王○詐○譎○之○國○興○立○爲○強○是○以○轉○相○放○效○
後○生○師○之○遂○相○吞○滅○并○大○兼○小○暴○師○經○歲○流○血○
滿○野○父○子○不○相○親○兄○弟○不○相○安○夫○婦○離○散○莫○保○
其○命○湑○然○道○德○絕○矣○晚○世○益○甚○萬○乘○之○國○七○千○

乘之國五。敵侔爭權。盡爲戰國。貪饕無恥。競進
無厭。國異政敎。各自制斷。上無天子。下無方伯。
力功爭強。勝者爲右。兵革不休。詐僞竝起。當此
之○時○雖○有○道○德○不○得○施○設○有○謀○之○強○負○阻○而○恃
固。連與交質。重約結誓。以守其國。故孟子孫卿
儒術之士。棄捐於世。而游說權謀之徒。見貴于
俗。是以蘇秦張儀公孫衍陳軫代厲之屬。生從
橫短長之說。左右傾側。蘇秦爲從。張儀爲橫。橫
則秦帝。從則楚王。所在國重。所去國輕。然當此

之時。秦國最雄。諸侯方弱。蘇秦結之。時六國爲一。以儗背秦。秦人恐懼。不敢窺兵於關中。天下不交兵者二十有九年。然秦國勢便。形利權謀。之士咸先馳之。蘇秦初欲橫。秦弗用。故東合從。及蘇秦死後。張儀連橫。諸侯聽之。西向事秦。是故始皇因四塞之國。據崤函之阻。跨隴蜀之饒。聽衆人之策。乘六世之烈。以蠶食六國。兼諸侯。并有天下。杖于詐謀之弊。終無信篤之誠。無道德之教。仁義之化。以綴天下之心。任刑罰以爲

治信小術以爲道。遂燔燒詩書。坑殺儒士。上小
堯舜。下邈二王。二世愈甚。惠不下施。情不上達。
君臣相疑。骨肉相疏。化道淺薄。綱紀敗壞。民不
見義。而懸於不甯。撫天下十四歲。天下大潰。詐
僞之弊也。其比王德。豈不遠哉。孔子曰。道之以
政。齊之以刑。民免而無恥。道之以德。齊之以禮。
有恥且格。夫使天下有所恥。故化可致也。苟以
詐僞偷活取容。自上爲之。何以率下。秦之敗也。
不亦宜乎。戰國之時。君德淺薄。爲之謀策者。不

得。不。因。勢。而。爲。資。據。時。而。爲。故。其。謀。扶。急。持。
傾。爲。一。切。之。權。雖。不。可。以。臨。教。化。兵。革。救。急。之。
勢。也。皆。高。才。秀。士。度。時。君。之。所。能。行。出。奇。策。異。
智。轉。危。爲。安。運。亡。爲。存。亦。可。喜。皆。可。觀。護。左。都。
水。使。者。光。祿。大。夫。臣。向。所。校。戰。國。策。書。錄。

上關尹子

陳氏曰漢志有關尹子九篇而隋唐志
皆不著錄意其書亡久矣殆依託也序
亦不類
向文

右新書著定關尹子九篇護左都水使者光祿

大夫臣劉向言。所校中秘書關尹子九篇。臣向校讎太常存七篇。臣向本九篇。臣向輒除錯不可考增闕斷續者九篇。成皆殺青。可繕寫。關尹子名喜。號關尹子。或曰關令子。隱德行。人易之。嘗請老子著道德經上下篇。列禦寇莊周皆稱道家。書篇皆寓名有章。章首皆有關尹子曰四字。篇篇敘異章。章義異。其旨同。辭與老列莊異。其歸同。渾質崖仄。汪洋大肆。然有式則使人泠泠。輕輕。不使人狂。蓋公授曹相國參。曹相國薨。

書葬至孝武皇帝時有方士來以七篇上上以
仙處之淮南王安好道聚書有此不出臣向父
德因治淮南王事得之臣向幼好焉寂士清人
能重愛黃老清靜不可闕臣向昧死上永始二
年八月庚子護左都水使者光祿大夫臣向謹
進上

上晏子

護左都水使者光祿大夫臣向言所校中書晏
子十一篇臣向謹與長社尉叅校讎太史書五

篇臣向所書一篇叅書十三篇凡中外書三十
篇爲八百三十八章除復重二十二篇六百三
十八章定著八篇二百一十五章外書無有三
十六章中書無有七十一章中外皆有以相定
中書以天爲芳又爲備先爲牛章爲長如此類
者多謹頗略櫛皆已定以殺青書可繕寫晏子
名嬰謚平仲萊人萊者今東萊地也晏子博聞
強記通於古今事齊靈公莊公景公以節儉力
行盡忠極諫道齊國君得以正行百姓得以附

親不用則退耕於野。用則必不詘義。不可脅以邪。白刃雖交胸。終不受崔杼之刼。諫齊君懸而至順。而刻及使諸侯。莫能詘其辭。其博通如此。蓋次管仲。內能親親。外能厚賢。居相國之位。受萬鍾之祿。故親戚待其祿而食。五百餘家。處士待而舉火者。亦甚衆。晏子衣苴布之衣。麋鹿之裘。駕敝車。疲馬。盡以祿給親戚朋友。齊人以此重之。晏子蓋短。其書六篇。皆忠諫其君文章。可觀義理。可法。皆合六經之義。又有復重文。

辭頗異不敢遺失復列以爲一篇又有頗不合經術似非晏子言疑後世辨士所爲者故亦不敢失復以爲一篇凡八篇其六篇可常置旁御覽謹第錄臣向昧死上

上子華子

漢藝文志及隋唐宋志悉無子華子吳競李淑二家書目亦不載朱子曰其理多取佛老醫卜其字多用左傳班史決非先秦古書

護左都水使者光祿大夫臣向言所校讎中子華子書凡二十有四篇以相校復重十有四篇

定著十篇皆以殺青書可繕寫子華子程氏名
本字子華晉人也晉自頃公失政政在六卿趙
簡子始得志招徠賢雋之士爲其家臣子華子
生于是時博學能通墳典邱索及故府傳記之
言性閎爽善持論不肯苟容於諸侯聚徒著書
自號程子名稱藉甚聞於諸侯孔子遇諸鄉歎
曰天下之賢士也簡子欲仕諸朝而不能致乃
遣使者奉纁幣聘以爲爵執圭是時簡子殺竇
犢及舜華孔子爲作臨河之操子華子亦爲之

不肯起簡子大怒將脅之以兵子華子去而之
齊齊景公不能用也子華子館於晏氏更題其
書曰子華子簡子卒襄子立子華子反於晉時
已老矣遂不復仕以卒今其書編離簡斷以是
門人弟子共相綴隨記其所聞而無次叙非子
故所著之書也大抵子華子以道德爲指歸而
綱紀以仁義存誠養操不苟於售唯孔子然後
知其賢齊大夫晏平仲與之爲久要之交當時
諸侯以勢相軋爭結怨連禍日以權譎爲事子

孟子正義卷之三
華子之言如持水納石不相齟答卒以不遇可
爲酸鼻謹目錄臣向昧死上

上列子

右新書定著八章護左都水使者光祿大夫臣
向言所校中書列子五篇臣向謹與長社尉臣
叅校讎太常書三篇太史書四篇臣向書六篇
臣參書二篇內外書凡二十篇以校除復重十
二篇定著八篇中書多外書少章亂布在諸篇
中或字誤以盡爲進以賢爲形如此者衆在新

書有棧校讐從中書已定皆以殺青書可繕寫
列子者鄭人也與鄭繆公同時蓋有道者也其
學本於黃帝老子號曰道家道家者秉要執本
清虛無爲及其治身接物務崇不競合於六經
而穆王湯問二篇迂誕恢詭非君子之言也至
於力命篇一推分命楊子之篇唯貴放逸二義
乖背不似一家之書然各有所明亦有可觀者
孝景皇帝時貴黃老術此書頗行於世及後遺
落散在民間未有傳者且多寓言與莊周相類

故太史公司馬遷不爲列傳謹第錄臣向昧死
上護左都水使者光祿大夫臣向所校列子書
錄永始三年八月壬寅上

上於陵子

鄧文原云此前史藝文及崇文總目所
無惟石廷尉熙明家藏有之○按其書
詞義蹇淺
必出僞撰

護左都水使者光祿大夫臣向言臣所校中書
於陵子十五篇以校除雜亂三篇著定十二篇
殺青書可繕寫臣按於陵子齊之廉士名子終

世稱陳仲子是也。仲子齊之世家兄戴爲齊王卿士，蓋祿萬鍾。仲子以爲不義而弗與共也。齊王將使爲大夫，不受，遂去齊居楚之於陵。身織履，妻辟纊，以爲衣食。楚王聞其賢，欲相之，不許。遂與其妻逃去，爲人灌園，著書十二篇，卒于楚。臣觀周室衰微，諸侯競爲富強，貪穢相率，草上之風，以故冉有爲季氏宰，富於周公。至於戰國，士適騰智，竊貴自雄。沈歟原始而廉風遂渺，是以顏觸魯連之徒，亂流而出，黽勉行事，輒以長。

傑○當○時○况○仲○子○遁○上○遁○民○舍○車○而○徒○礪○志○潔○身○
亡○有○疑○二○者○哉○卽○其○違○遠○中○庸○取○譏○通○人○至○讀○
其○先○人○夢○葵○諸○篇○可○謂○亡○歎○幽○昧○足○有○嚴○慕○者○
詩○云○相○在○爾○室○上○不○愧○於○屋○漏○仲○子○有○焉○晚○近○
王○公○不○閑○軌○度○貪○侈○轉○相○法○則○用○澆○元○元○傾○世○
遐○顧○甯○有○其○人○爲○之○綱○紀○故○臣○願○陛○下○少○加○覽○
觀○風○諭○臣○工○庶○幾○有○益○道○教○臣○向○謹○第○錄○昧○死○
上○

卿名况趙人也。楚相春申君以爲蘭陵令。或謂春申君曰。湯以七十里。文王以百里。孫卿賢者。今與之百里地。楚其危乎。春申君謝之。孫卿去之趙。後客或謂春申君曰。伊尹去夏入殷。殷王而夏亡。管仲去魯入齊。魯弱而齊強。故賢者所在。君尊國安。今孫卿天下賢人。所去之國。其不安乎。春申君使人聘孫卿。乃還。復爲蘭陵令。

誠子歆書

告歆思之。無忽若。未有異德蒙恩甚厚。將何以

報董生有云。弔者在門。賀者在閭。言有憂則恐。懼敬事。敬事則必有善功。而福至也。又云。賀者在門。弔者在閭。言受福則驕奢。驕奢則禍至。故弔隨而來。齊頃公之始。藉霸者之餘威。輕侮諸侯。虧蹇跂之容。故被黻之禍。遁服而亡。所謂賀者在門。弔者在閭也。兵敗師破。人皆弔之。恐懼自新。百姓愛之。諸侯皆歸其所奪邑。所謂弔者在門。賀者在閭也。

又

散通詩書能屬文成
帝召見署爲黃門郎

叩頭謹戰戰慄慄乃可必免
今若年少得黃門侍郎顯處也新頃皆謝貴人

司馬文集

卷全

序

早

騷

九歎

伊伯庸之末胄兮，諒皇直之屈原。云余肇祖於
高陽兮，惟楚懷之嬋連。原生受命于貞節兮，鴻
永路有嘉名。齊名字於天地兮，竝光明於列星。
吸精粹而吐氛濁兮，橫邪世而不取容。行叩誠
而不阿兮，遂見排而逢讒。后聽虛而黜實兮，不
吾理而順情。腸憤悁而含怒兮，志遷蹇而左傾。
心懔懔而不我與兮，躬速速而不吾親。辭靈脩

而隕意兮。吟澤畔之江濱。椒桂羅以顛覆兮。有
竭信而歸誠。讒夫藹藹而曼著兮。曷其不舒予
情。始結言於廟堂兮。信中塗而叛之。懷蘭蕙與
蘅芷兮。行中壑而散之。聲哀哀而懷高邱兮。心
愁愁而思舊邦。願承間而自恃兮。徑淫暄而道
塵。顏黥鰲以沮敗兮。精越裂而衰耄。裳襜褕而
含風兮。衣納納而掩露。赴江湘之湍流兮。順波
湊而下降。徐徘徊於山阿兮。飄風來之洶洶。馳
余車兮。立石。步余馬兮。洞庭。平明發兮。蒼梧。夕

投宿兮石城。芙蓉葢而菱華車兮。紫貝闕而玉
堂。薜荔飾而陸離薦兮。魚鱗衣而白蜺裳。登逢
龍而下隕兮。違故都之漫漫。思南郢之舊俗兮。
腸一夕而九運。揚流波之潢潢兮。體溶溶而東
回。心怊悵以永思兮。意晻晻而自頽。白露紛紛
以塗塗兮。秋風瀏瀏以蕭蕭。身永流而不還兮。
竟長逝而常愁。

歎曰。譬彼流水。紛揚磔兮。波逢洶涌。紛滂沛兮。
榆揚滌盪。漂流隕往。觸岑石兮。龍叩將圈。繚戾

宛轉阻相薄兮。遭紛逢凶蹇離尤兮。垂文揚采
遺將來兮。

右逢紛

靈懷其不吾知兮。靈懷其不吾聞。就靈懷之皇
祖兮。愬靈懷之鬼神。靈懷曾不吾知兮。卽聽夫
讒人之諛辭。余辭上參於天墜兮。旁引之於四
時。指日月使延照兮。撫招搖以質正。立師曠俾
端詞兮。命咎繇使竝聽。兆出名曰正則兮。封發
字曰靈均。余幼既有此鴻節兮。長愈固而彌純。

不從俗而諛行兮。直躬指而信志。不在繩以迫
曲兮。屈情素以從事。端余行其如玉兮。述皇輿
之踵跡。羣阿容以晦光兮。皇輿覆以幽辟。輿中
塗以回畔兮。駟馬驚而橫犇。執組者不能制兮。
必折軛而摧轅。斷鑣銜以馳驚兮。暮去次而敢
止。路蕩蕩其無人兮。遂不禦乎千里。身衡陷而
下流兮。不可獲而復登。不顧身之卑賤兮。惜皇
輿之不興。出國門而端指兮。方冀壹寤而錫還。
哀僕夫之坎毒兮。屢離憂而逢患。九年之中不

吾反兮。思彭咸之水遊。惜師延之浮渚兮。赴汨
羅之長流。遵曲江之逶移兮。觸石碣而衡遊。波
灋灋而揚澆兮。順長瀨之濁流。凌黃沱而下低
兮。思還流而復反。玄輿馳而竝集兮。身容與而
日遠。擢舟杭以橫瀡兮。涇湘流而南極。立江界
而長吟兮。愁哀哀而累息。情慌忽以忘歸兮。神
浮遊以高厲。志蚤蚤而懷顧兮。覓眷眷而獨逝。
歎曰。余思舊邦。心依違兮。日暮黃昏。嗟幽悲兮。
去郢東遷。余誰慕兮。讒夫黨旅。其以茲峻兮。河

永淫淫情所願兮顧瞻郢路終不返兮

右靈懷

惟鬱鬱之憂毒兮志坎壈而不違身憔悴而考
旦兮日黃昏而長悲閔空宇之孤子兮哀枯楊
之冤鵲孤雌吟於高墉兮鳴鳩棲於桑榆玄媛
失於潛林兮獨偏棄而遠放征夫勞於周行兮
處婦憤而長望申誠信而罔違兮情素潔於紉
帛光明齊於日月兮文采耀於玉石傷壓次而
不發兮思沈抑而不揚芳懿懿而終敗兮名靡

散而不彰。背玉門以奔驚兮。蹇離尤而于詬。若
龍逢之沈首兮。王子比干之逢醢。念社稷之幾
危兮。反爲讐而見怨。思國家之離沮兮。躬獲愆
而結難。若青蠅之僞質兮。晉驪姬之反情。恐登
階之逢殆兮。故退伏於末庭。孽子之號咷兮。本
朝蕪而不治。犯顏色而觸諫兮。反蒙辜而被疑。
苑薜蘿與茵若兮。漸藁本於洿瀆。淹芳芷於腐
井兮。弃雞駭於筐簞。執棠谿以刺蓬兮。秉干將
以割肉。筐澤瀉以豹鄲兮。波判和以繼繁。持園

濁猶未清兮世殺亂猶未察欲容與以俟時兮
懼年歲之旣晏顧屈節以從流兮心鞏鞏而不
夷甯浮沅而馳騁兮下江湘以逶迤
歎曰山中檻檻余傷懷兮征夫皇皇其孰依兮
經營原野杳冥冥兮乘騏驎舒吾情兮歸骸
舊邦莫誰語兮長辭遠逝乘湘去兮

右離世

志隱隱而鬱怫兮愁獨哀而冤結腸紛紜以繚
轉兮涕漸漸其若屑情慨慨而長懷兮信上皇

而質正合五嶽與八靈兮。訊九魁與六神指列
宿以白情兮。訴五帝以置詞。北斗爲我質中兮。
太一爲余聽之。云服陰陽之正道兮。御后土之
中。和佩蒼龍之蚴虬兮。帶隱虹之透蜺。曳彗星
之皓盱兮。撫朱爵與鷄鵠。遊青霧之颯戾兮。服
雲衣之披披。杖玉策與朱旗兮。垂明月之玄珠。
與霓旌之帶翳兮。建黃昏之總旄。躬純粹而罔
愆兮。承皇考之妙儀。惜往事之不合兮。橫汨羅
而下厲。乘隆波而南度兮。逐江湘之順流。赴陽

戾之潢洋兮。下石瀨而登州。陸魁堆以蔽視兮。
雲冥冥而闇前山。峻高以無垠兮。遂會閔而迫
身。雪雰雰而薄木兮。雲霏霏而隕集。阜隘狹而
幽險兮。石嶮嵯以翳日。悲故鄉而發怒兮。去余
邦之彌久。背龍門而入河兮。登大墳而望夏首。
橫舟航而濟湘兮。耳聊啾而懔懔。波滢滢而周
流兮。鴻溶溢而滔蕩。路曼曼其無端兮。周容容
而無識。引日月以指極兮。少須臾而釋思。水波
遠以冥冥兮。眇不睹其東西。順風波以南北兮。

霧宵晦以紛闇。日杳杳以西頽。兮路長遠而窘迫。欲酌醴以娛意兮。蹇騷騷而不釋。歎曰。飄風蓬龍埃拂拂兮。草木搖落時槁悴兮。遭傾遇禍不可救兮。長吟永歎涕滂滂兮。舒情噉詩冀以自免兮。頽流下逝身日以遠兮。

右怨思

悲。余。性。之。不。可。改。兮。屢。懲。艾。而。不。遂。服。覺。酷。以。殊。俗。兮。貌。揭。揭。以。巍巍。譬。若。王。僑。之。乘。雲。兮。載。赤。霄。而。凌。太。清。欲。與。天。地。參。壽。兮。與。日。月。而。比。

榮登崑崙而北首兮。悉靈囿而來謁。選鬼神於
太陰兮。登閭闔於玄闕。回朕車俾西引兮。褰虹
旗於玉門。馳六龍於三危兮。朝四靈於九濱。結
余軫於西山兮。橫飛谷以南征。絕都廣以直指
兮。厯祝融於朱冥。柱玉衡於炎火兮。委兩館於
咸唐。貫頰濛以東竭兮。維六龍於扶桑。周流覽
於四海兮。志升降以高馳。徵九神於回極兮。建
虹采以招指。駕鸞鳳以上遊兮。從玄鶴與鷦朋。
孔鳥飛而送迎兮。騰羣鶴於瑤光。排帝宮與羅

囿。今。升。縣。圃。以。眩。滅。結。瓊。枝。以。雜。佩。今。立。長。庚。
以。繼。日。凌。驚。雷。以。軼。駭。電。今。綴。鬼。谷。於。北。辰。鞭。
風。伯。使。先。驅。今。囚。靈。立。於。虞。淵。愬。高。風。以。徘徊。
今。覽。周。流。於。朔。方。就。顓。頊。而。噉。詞。今。考。玄。冥。於。
空。桑。旋。車。逝。於。崇。山。今。奏。虞。舜。於。蒼。梧。濟。楊。舟。
於。會。稽。今。就。申。胥。於。五。湖。見。南。郢。之。流。風。今。殞。
余。躬。於。沅。湘。望。舊。邦。之。黯。黯。今。時。溷。濁。猶。未。央。
懷。蘭。茝。之。芬。芳。今。妬。被。離。而。折。之。張。絳。帷。以。檐。
檐。兮。風。邑。邑。而。蔽。之。日。暍。暍。其。西。舍。兮。陽。炎。炎。

而復顧聊假日以須臾兮何騷騷而自故

歎曰譬彼蛟龍乘雲浮兮汎淫頽溶紛若霧兮
潺湲轆轤雷動電發馭高舉兮升虛凌冥沛獨
浮清入帝宮兮搖翹奮羽馳風騁雨遊無窮兮

右遊逝

覽屈氏之離騷兮心哀哀而怫鬱聲嗷嗷以寂
寥兮顧僕夫之憔悴揆諸諛而匡邪兮切洪濇
之流俗盪浪淒之姦咎兮夷蠢蠢之溷濁懷芬
香而挾蕙兮佩江離之菲菲握申椒與杜若兮

冠浮雲之峨峨。登長陵而四望兮。覽芷圃之蠡
蠡。遊蘭皋與蕙林兮。玩玉石之嶮嵯。揚精華以
眩耀兮。芳鬱渥而純美。結桂樹之旖旎兮。紉荃
蕙與辛夷。芳若茲而不御兮。捐林薄而菀死。驅
子僑之奔走兮。申徒狄之赴淵。若夷田之純美
兮。介子推之隱山。晉申生之離殃兮。荆和氏之
泣血。吳子胥之抉眼兮。王子比干之橫廢。飲卑
身而下體兮。心隱惻而不置。方園殊而不合兮。
鉤繩用而異態。欲俟時於須臾兮。日陰匿其將

暮。時遲遲。其日進兮。年忽忽而日度。妄周容而
入世兮。內距閉而不開。埃時風之清激兮。愈氛
霧其如塵。進雄鳩之耿耿兮。讒紛紛而蔽之。默
順風以偃仰兮。尚由由而進之。心憤悵以寃結
兮。情舛錯以曼憂。舉薜荔於山野兮。采撚枝於
中州。望高邱而歎涕兮。悲吸吸而長懷。孰契契
而委棟兮。日晡晡而下頽。

歎曰。油油江湘。長流汨兮。挑揄揚波。盪迅疾兮。
憂心展轉。愁怫鬱兮。寃結未舒。長隱忿兮。丁時

逢殃孰可奈何兮。勞心涓涓涕滂沱兮。

右惜賢

悲余心之惛惛兮。哀故邦之逢殃。辭九年而不復兮。獨熒熒而南行。思余俗之流風兮。心紛錯而不受。遵野莽以呼風兮。步從容於山藪。巡陸夷之曲衍兮。幽空虛以寂寞。倚石巖以流涕兮。憂憔悴而無樂。登巘岼以長企兮。望南郢而闕之。山修遠其遼遼兮。塗漫漫其無時。聽玄鶴之晨鳴兮。干蒿岡之峨峨。獨憤積而哀娛兮。翔江

洲而安歌三鳥飛飛以自南兮覽其志而欲北
願寄言於三鳥兮去飄疾而不可得欲遷志而
改操兮心紛結而未離外彷徨而遊覽兮內惻
隱而含哀聊須臾以時忘兮心漸漸其煩錯願
假簧以舒憂兮志紆鬱其難釋歎離騷以揚意
兮猶未殫於九章長噓吸以於悵兮涕橫集而
成行傷明珠之赴泥兮魚眼璣之堅藏同鴛羸
與乘駟兮雜班駁與闐茸葛藟蘂於桂樹兮鴟
鴞集於木蘭倥偬談於廊廟兮律魁放乎山間

惡虞氏之簫韶兮。好遺風之激楚。潛周鼎於江
淮兮。爨土鬻於中宇。且人心之有舊兮。而不可
保。長遭彼南道兮。以征夫宵行。思念郢路兮。還
顧睠睠。涕流交集兮。泣下漣漣。

歎曰。登山長望。中心悲兮。茆彼青青。泣如頽兮。
畱思北顧。涕漸漸兮。折銳摧矜。凝汜濫兮。念我
熒熒。寃誰求兮。僕夫懷悴。散若流兮。

右憂苦

昔皇考之嘉志兮。喜登能而亮賢。情純潔而罔

歲兮。姿盛質而無愆。放佞人與諂諛兮。斥讒夫
與便嬖。親忠正之悃誠兮。招貞良與明智。心溶
溶其不可量兮。情澹澹其若淵。回邪辟而不能
入兮。誠願藏而不可遷。逐下秩於後堂兮。迎宓
妃於伊雒。荆讒賊於中瘤兮。選呂管於榛薄。叢
林之下無怨士兮。江河之畔無隱夫。三苗之徒
以放逐兮。伊臯之倫以充廬。今反表以爲裏兮。
顛裳以爲衣。戚宋萬於兩楹兮。廢周邵於遐夷。
却騏驥以轉運兮。騰驢羸以馳逐。蔡女黜而出

帷兮。戎婦入而綵繡服。慶忌囚於阱室兮。陳不
占戰而赴圍。破伯牙之號鐘兮。挾人箏而彈緯。
藏璿石於金匱兮。捐赤瑾於中庭。韓信蒙於介
冑兮。行夫將而攻城。莞芳棄於澤洲兮。咆騰蠹
於筐簾。麒麟奔於九臯兮。熊羆羣而逸囿。折芳
枝與璫華兮。樹枳棘與薪柴。握荃蕙與射干兮。
耘藜藿與蘘荷。惜今世其何殊兮。遠近思而不
同。或沈淪其無所達兮。或清激其無所通。哀余
生之不當兮。獨蒙毒而逢尤。雖謇謇以申志兮。

君乖差而屏之誠惜芳之菲菲兮反以茲爲腐也懷椒聊之藹藹兮乃逢紛以懼詬

歎曰嘉皇旣沒終不返兮山中幽險郢路遠兮
讒人譏譏孰可愬兮征夫罔極誰可語兮行踰
累歛聲喟喟兮懷憂含戚何佗僚兮

右愍命

冥冥深林兮樹木鬱鬱山參差以嶮巖兮阜杳
杳以蔽日悲余心之惛惛兮日眇眇而遺泣風
騷屑以搖木兮雲吸吸以湫戾悲予生之無歡

兮愁倥偬於山陸旦徘徊於長阪兮夕彷徨而
獨宿髮披披以鬢鬢兮躬劬勞而瘠悴蒐侂侂
而南行兮泣霑襟而濡袂心嬋媛而無告兮口
噤閉而不言違郢都之舊閭兮回湘沅而遠遷
念余邦之橫陷兮宗鬼神之無次閔先嗣之中
絕兮心遑惑而自悲聊浮遊於山陬兮步周流
於江畔臨深水而長嘯兮且倘佯而汜觀興離
騷之微文兮冀靈修之壹悟還余車於南郢兮
復往軌於初古道修遠其難遷兮傷余心之不

能已。背三五之典刑兮。絕洪範之辟紀。播規渠以背度兮。錯權衡而任意。操繩墨而放棄兮。傾容幸而侍側。甘棠枯於豐草兮。藜棘樹於中庭。西施斥於北宮兮。妲己倚於彌楹。烏獲戚而驂乘兮。燕公操於馬圉。荆瞞登於清府兮。咎繇棄於壑外。蓋見茲以永歎兮。欲登階而狐疑。棄白水而高驚兮。因徙弛而長詞。

歎曰。倘佯墟阪。沼水深兮。容與漢渚。滄淫淫兮。鍾牙已死。誰爲聲兮。纖阿不遇。焉舒情兮。曾哀

悽欷心離離兮還顧高邱泣如灑兮

洪範五行傳

雨木冰

春秋成公十六年

冰者陰之盛而水滯者也。木者少陽貴臣卿大夫之象也。此人將有害則陰氣協木。木先寒。故得雨而冰也。是時叔孫喬如出奔公子偃誅死。

御廩災

春秋桓公十四年

御廩夫人八妾所舂米之藏。以奉宗廟者也。時夫人有淫行。挾逆心。天戒若曰。夫人不可以奉宗廟。桓不寤。與夫人俱會齊。夫人譖桓公於齊。

侯齊侯殺桓公

齊大災

春秋嚴公二十年

齊桓好色聽女口以妾爲妻適庶數更故致大災桓公不寤及死適庶分爭九月不得葬

西宮災

春秋釐公二十年

釐立妾母爲夫人以入宗廟故天災愍宮若曰去其卑而親者將害宗廟之正禮

新宮災

春秋成公三年

時魯三桓子孫始執國政宣公欲誅之恐不能

使大夫公孫歸父如晉謀未反宣公死三家譖歸父於成公成公父喪未葬聽讒而逐其父之臣使奔齊故天災宣宮明不用父命之象也

宋災

春秋襄公九年

先是宋公聽讒逐其大夫華弱出奔魯

宋災

春秋襄公三十年

先是宋公聽讒而殺太子痤應火不炎上之罰也

陳火

春秋昭公九年

先是陳侯弟招殺陳太子偃師。皆外事。不因其
宮館者。略之也。八年十月壬午。楚師滅陳。春秋
不與蠻夷滅中國。故復書陳火也。

宋衛陳鄭災

春秋昭公十八年

宋陳王者之後。衛鄭周同姓也。時周景王老。劉
子單子事王子猛。尹氏召伯毛伯事王子鼂。子
鼂楚之出也。及宋衛陳鄭亦皆外附於楚。亡尊
周室之心。後三年景王崩。王室亂。故天災四國。
天戒若曰。不救周。反從楚。廢世子。立不正。以害

王室明同臯也。

趙叢臺災

高后元年

是時呂氏女爲趙王后，嫉妒將爲讒口以害趙王，王不寤焉，卒見幽殺。

未央宮凌室織室災

惠帝四年

元年呂太后殺趙王如意，殘戮其母戚夫人。是歲十月壬寅，太后立帝姊魯元公主女爲皇后。其乙亥，凌室災，明日織室災。凌室所以供養飲食，織室所以奉宗廟衣服，與春秋御廩同義。天

戒若曰皇后亡奉宗廟之德將絕祭祀其後皇
后亡子後宮美人有男太后使皇后名之而殺
其母惠帝崩嗣子立有怨言太后廢之更立呂
氏子弘爲少帝賴大臣共誅諸呂而立文帝惠
后幽廢

未央宮東闕罌恩災

文帝七年

東闕所以朝諸侯之門也罌恩在其外諸侯之
象也漢興大封諸侯王連城數十文帝卽位賈
誼等以爲違古制度必將叛逆先是濟北淮南

王皆謀反，其後吳楚七國舉兵而誅。

燕城南門災

昭帝元鳳元年

時燕王使邪臣通於漢，爲讒賊，謀逆亂，南門者通漢道也。天戒若曰：邪臣往來爲姦讒於漢，絕亡之道也。燕王不寤，卒伏其辜。

孝文廟正殿災

元鳳四年

孝文太宗之君與成周宣榭火同義。先是皇后父車騎將軍上官安，安父左將軍桀，謀爲逆，大將軍霍光誅之。皇后以光外孫，年少不知居位。

如故。光欲后有子，因上侍疾。醫言：「禁內後宮皆不得進。」唯皇后顓寢。皇后年六歲而立。十三年而昭帝崩，遂絕繼嗣。光執朝政，猶周公之攝也。是歲正月上加元服。通詩尚書，有明愍之性。光亡周公之德。秉政九年，久於周公。上旣已冠，而不歸政，將爲國害。故正月加元服，五月而災見。古之廟皆在城中。孝文廟始出居外。天戒若曰：「去貴而不正者。」宣帝旣立，光猶攝政，驕溢過制。至妻顯，殺許皇后。光聞而不討，後遂誅滅。

孝武園白鶴館災

元帝初元三年

先是前將軍蕭望之光祿大夫周堪輔政爲佞臣石顯許章等所譖望之自殺堪廢黜明年白鶴館災園中五里馳逐走馬之館不當在山陵昭穆之地天戒若曰去貴近逸遊不正之臣將害忠良後章坐走馬上林下烽馳逐免官

孝宣杜陵園東闕南方災

永光四年

先是上復徵用周堪爲光祿勳及堪弟子張猛爲太中大夫石顯等復譖毀之皆出外遷是歲

上復徵堪領尚書。猛給事中。石顯等終欲害之。園陵小於朝廷。闕在司馬門中。內臣石顯之象也。孝宣親而貴門。闕法令所從出也。天戒若曰。去法令。內臣親而貴者。必爲國害。後堪希得進見。因顯言事。事決。顯口堪病不能言。顯誣告張猛。自殺於公車。成帝卽位。顯卒伏辜。

大水亡麥禾

春秋嚴公二十八年

水旱當書。不書水旱而曰大。亡麥禾者。土氣不養。稼穡不成者也。是時夫人淫於二叔。內外亡

別。又因凶飢。一年而三築臺。故應是而稼穡不成。飾臺榭。內淫亂之罰云。遂不改寤。四年而死。既流二世奢淫之患也。

石言於晉

左傳昭公八年

石白色爲主屬白祿

宋大水

嚴公十一年

時宋愍公驕慢。睹災不改。而明年與其臣宋萬博戲。婦人在側。矜而罵萬。萬殺公之應。

大水

嚴公二十四年

哀姜初入、公使大夫宗婦見用幣又淫於二叔、公弗能禁、臣下賤之、故是歲明年仍大水、

秋大水饑

宣公十年

宣公殺子赤而立子赤齊出也、故懼以濟西田、賂齊、邾子貜且亦齊出也、而宣比與邾交兵、臣下懼齊之威、創邾之禍、皆賤公行而非其正也、

秋大水

襄公二十四年

先是襄慢鄰國、是以邾伐其南、齊伐其北、莒伐其東、百姓騷動、後又犯彊齊也、大水饑、穀不成、

其災甚也

恒雨

書

向以爲大水

隱公九年三月癸酉大雨震電庚辰大雨

雪春秋

周三月。今正月也。當雨水。雪雜雨。雷電未可以
發也。旣已發也。則雪不當復降。皆失節。故謂之
異。於易。雷以二月出。其卦曰豫。言萬物隨雷出
地。皆逸豫也。以八月入。其卦曰歸妹。言雷復歸

入地。則孕毓根核。保藏蟄蟲。避盛陰之害。出地。則養長華實。發揚隱伏。宜盛陽之德。八能除害。出能興利。人君之象也。是時隱以弟桓幼。代而攝立。公子翬見隱居位已久。勸之遂立。隱既不許。翬懼而易其辭。遂與桓共殺隱。天見其將然。故正月大雨水。而雷電。是陽不閉。陰出涉危難。而害萬物。天戒若曰。爲君失時。賊弟佞臣將作亂矣。後八日大雨雪。陰見間隙而勝。陽篡殺之。既將成也。公不寤。後二年而殺。

昭帝時昌邑王賀遣中大夫之長安多治
不注冠以賜大臣又以冠奴

近服妖也時王賀狂悖聞天子不豫弋獵馳騁
如故與騶奴宰人游居娛戲驕嫚不敬冠者尊
服奴者賤人賀無故好作非常之冠暴尊象也
以官奴者當自至尊墜至賤也其後帝崩無子
漢大臣徵賀爲嗣卽位狂亂無道縛戮諫者夏
侯勝等於是大臣白皇太后廢賀爲庶人賀爲
王時又見大白狗冠方山冠而無尾此服妖亦

犬旤也。賀以問郎中令龔遂。遂曰：「此天戒言在
仄者盡冠狗也。去之則存不去則亾矣。」賀旤廢
數年。宣帝封之爲列侯。復有皐死不得置後。又
犬旤無尾之效也。

雄雞自斷其尾

近雞旤也。是時王有愛子子鼂。王與賓起陰謀
欲立之。田於北山。將因兵衆殺適子之黨。未及
而崩。三子爭國。王室大亂。其後賓起誅死。子鼂
奔楚而敗。

元帝永光中雄雞生角京房以爲已知時
恐當之

房失雞占雞者小畜主司時起居人小臣執事
爲政之象也言小臣將秉君威以害政事猶石
顯也竟甯元年石顯伏辜此其效也

鼯鼠食郊牛角改卜牛又食其角

成公七年

以爲近青祥亦牛旤也不敬而備霧之所致也
昔周公制禮樂成周道故成王命魯郊祀天地
以尊周公至成公時三家始顓政魯將從此衰

天愍周公之德。痛其將有敗亡之旣。故於郊祭而見戒云。鼠。小蟲。性盜竊。鼯又其小者也。牛。大畜。祭天。尊物也。角。兵象。在上。君威也。小小鼯鼠。食至尊之牛角。象季氏。乃陪臣盜竊之人。將執國命以傷君威。而害周公之祀也。改卜牛。鼯鼠又食其角。天重語之也。成公怠慢昏亂。遂君臣更執于晉。至於襄公。晉爲溴梁之會。天下大夫皆奪君政。其後三家逐昭公。卒死於外。幾絕周公之祀。

麇食郊牛死

定公十五年

定公知季氏逐昭公。臯惡如彼。親用孔子。爲夾谷之會。齊人徠歸鄆。謹龜陰之田。聖德如此。反用季桓子。淫於女樂。而退孔子。無道甚矣。詩曰。人而亡儀。不死何爲。是歲五月。定公薨。牛死之應也。

麇食郊牛

哀公元年

天意汲汲於用聖人。逐三家。故復見戒也。哀公年少。不親見昭公之事。故見敗亡之異。已而哀

不寤身奔於粵。此其效也。

吳二城門自傾大船自覆

景帝三年

近金沴木。木動也。先是吳王濞以太子死於漢。稱疾不朝。陰與楚王戊謀爲逆亂。城猶國也。其一門名曰楚門。一門曰魚門。吳地以船爲家。以魚爲食。天戒若曰。與楚所謀。傾國覆家。吳王不寤。正月與楚俱起兵。身死國亡。

庶徵之恒暘

春秋大旱也。其夏旱雩祀。謂之大雩。不傷二穀。

謂之不雨。

多麋

嚴公十七年

麋色青近青祥也。麋之爲言迷也。蓋牝獸之淫者也。是時嚴公將取齊之淫女。其象先見。天戒若曰。勿取齊女。淫而迷國。嚴不寤。遂取之。夫人旣入。淫于二叔。終皆誅死。幾亡社稷。

庶徵之恒燠

書

春秋亾冰也。小燠不書。無冰然後書。舉其大者也。

春亾冰

桓公十五年

周春。今冬也。先是連兵鄰國。三戰而再敗也。內失百姓。外失諸侯。不敢行誅罰。鄭伯突篡兄而立。公與相親。長養同類。不明善惡之罰也。

二月無冰

成公元年

時公幼弱。政舒緩也。

春無冰

襄公二十八年

先是公作三軍。有侵陵用武之意。於是鄰國不和。伐其三鄙。被兵十有餘年。因之以飢饉。百姓怨望。臣下心離。公懼而弛緩。不敢行誅罰。楚有

夷狄行。公有從楚心。不明善惡之應。

隕霜不殺草

僖公三十三年

今十月、周十二月、於易五爲天位、爲君位。九月陰氣至五、通於天位。其卦爲剝。剝落萬物。始大殺矣。明陰從陽命。臣受君令而後殺也。今十月隕霜而不能殺艸。此君誅不行。舒緩之應也。是時公子遂顓權、三桓始世官。天戒若曰。自此之後。將皆爲亂矣。文公不寤。其後遂殺子赤三家。逐昭公。

伊陟相太戊。毫有祥桑穀共生。書序

殷道既衰。高宗承敝而起。盡涼陰之哀。天下應之。既獲顯榮。怠於政事。國將危亡。故桑穀之異見。桑猶喪也。穀猶生也。殺生之秉失。而在下近草妖也。

高宗祭成湯。有蜚雉登鼎耳而雊。書序

雉鳴者雄也。以赤色為主。於易離爲雉。雉南方近赤祥也。

十二月李梅實。僖公三十三年

周十二月。今十月也。李梅當剝落。今反華實。近草妖也。先華而後實。不書華。舉重者也。陰成陽事。象臣顓君作威福。

皇后曾祖父濟南東平陵王伯墓門梓柱
卒生枝葉上出屋

王氏貴盛。將代漢家之象也。

鸛鵒來巢

昭公二十五年

有蜚有蠹。不言來者。氣所生。所謂眚也。鸛鵒言來者。氣所致。所謂祥也。鸛鵒夷狄穴藏之禽。來

至中國。不穴而巢。陰居陽位。象季氏將逐昭公。
去宮室而居外野也。鸛鵒白羽旱之祥也。穴居
而好水。黑色爲主。急之應也。天戒若曰。旣失衆。
不可急。暴急。暴陰將持節陽以逐爾。去宮室而
居外野矣。昭不寤而舉兵圍季氏。爲季氏所敗。
出奔於齊。遂死于外野。

白頸烏與黑烏羣鬪。楚國呂縣白頸不勝。
墮泗水中。死者數千。

近白黑祥也。時楚王戊暴逆無道。刑辱申公。與

吳王謀反。烏羣鬪者。師戰之象也。白頸者。小明
小者。敗也。墮于水者。將死水地。王戊不寤。遂舉
兵應吳。與漢大戰。兵敗而走。至於丹徒。爲越人
所斬。墮死于水之效也。

禿鷲集昌邑王殿下

水鳥色青青。祥也。時王馳騁無度。慢侮大臣。不
敬至尊。有服妖之象。故青祥見也。野鳥入處。宮
室將空。王不寤。卒以亡。

宋有生女子。赤而毛。

魯襄公時

時則火災、赤青之明應也、

天雨血于宜陽一頃所

惠帝二年

赤青也、時又冬雷桃李華、常燠之罰也、是時政
舒緩。諸呂用事。讒口妄行。殺三皇子。建立非嗣。
及不當立之王。退王陵趙堯周昌。呂太后崩。大
臣共誅滅諸呂。僵尸流血、

庶徵之恒寒

春秋無其應。周之末世。舒緩微弱。政在臣下。燠
煖而已。故藉秦以爲驗。秦始皇帝卽位尚幼。委

政太后、太后淫于呂不韋及嫪毐、封毐爲長信侯、以太原郡爲毐國、宮室苑囿自恣、政事斷焉、故天冬雷、以見陽不禁閉、以涉危害、舒燠迫近之變也。始皇旣冠、毐懼誅、作亂、始皇誅之、斬首數百級、大臣二十人、皆車裂以徇、夷滅其宗、遷四千餘家于房陵、是歲四月、寒民有凍死者數年之間、緩急如此、寒燠輒應、此其效也。常雨屬貌不恭、

十月雨雪

桓公八年

時夫人有淫齊之行。而桓有妬媚之心。夫人將殺。其象見也。桓不覺寤。後與夫人俱如齊而殺死。凡雨陰也。雪又雨之陰也。出非其時。追近象也。

冬大雨雪

釐公十年

先是釐公立妾爲夫人。陰居陽位。陰氣盛也。

正月大雨雪

昭公四年

昭取于吳而爲同姓。謂之吳孟子。君行于上。臣非于下。又三家已彊。皆賤公行。慢侮之心生。

十月隕霜殺菽 定公元年

周十月今八月也。消卦爲觀。陰氣未至君位而殺。誅罰不由君出。在臣下之象也。是時季氏逐昭公。公死于外。定公得立。故天見災以視公也。釐公二年十月。隕霜不殺艸。爲嗣君微失秉事之象也。其後卒在臣下。則災爲之生矣。異故言革。災故言菽。重殺穀。

秋大雨雹 釐公二十九年

盛陽雨水。溫煖而湯熱。陰氣脅之不相入。則轉

而爲雹。盛陰雨雪。凝滯而冰寒。陽氣薄之不相入。則散而爲霰。故沸湯之在閉器。而湛于寒泉。則爲冰。及雪之銷。亦冰解而散。此其驗也。故雹者陰脅陽也。霰者陽脅陰也。春秋不書霰者。猶月食也。釐公末年。信用公子遂。遂專權自恣。將至於殺君。故陰脅陽之象見。釐公不寤。遂終專權。後二年。殺子赤。立宣公。

晉文公卒。庚辰。將殯于曲沃。出絳。柩有聲。

如牛。

近鼓妖也。喪凶事。聲如牛。怒象也。將有急怒之謀。以生兵革之禍。是時秦穆公遣兵襲鄭。而不假道還。晉大夫先軫謂襄公曰。秦師過不假塗。請擊之。遂要峭阨以敗秦師。匹馬簡輪無反者。操之急矣。晉不惟舊而聽虐謀。結怨彊國。四被秦寇。禍流數世。凶惡之效也。

無雲而雷

秦二世元年

雷。當。託。於。雲。猶。君。託。於。臣。陰。陽。之。合。也。二。世。不。恤。天。下。萬。民。有。怨。畔。之。心。是。歲。陳。勝。起。天。下。畔。

趙高作亂秦遂以亡

河魚大上

史記秦始皇八年

近魚孽也是歲始皇弟長安君將兵擊趙反死屯留軍吏皆斬遷其民於臨洮明年有繆毒之誅魚陰類民之象逆流而上者民將不從君令爲逆行也其在天文魚星中河而處車騎滿野至於二世暴虐愈甚終用急亡

秋螽

桓公五年

介蟲之孽屬言不從是歲公獲二國之聘取鼎

易邑興役起城

有蜚

嚴公二十九年

蜚色青近青青也。非中國所有。南越盛暑。男女同川澤。淫風所生。爲蟲臭惡。是時嚴公取齊淫女爲夫人。旣入。淫於二叔。故蜚至。天戒若曰。今誅絕之尚及。不將生臭惡。聞於四方。嚴不寤。其後夫人與兩叔作亂。二嗣以殺。卒皆被辜。

秋兩螽于宋

文公三年

先是宋殺大夫而無罪。有暴虐賦歛之應。

劉子政集

卷全

五

八月螽

宣公六年

先是時宣伐莒向後此再如齊謀伐萊十三年
秋螽公孫歸父會齊伐莒十五年秋螽宣公
歲數有軍旅

八月螽

襄公七年

先是襄興師救陳滕子邾子小邾子皆來朝夏
城費

十二月螽

哀公十二年

春用田賦冬而螽十三年九月螽十二月螽比

三螽虐取於民之效也。

齊襄公田於貝邱見豕從者曰公子彭生也公怒曰射之豕人立而號公懼墜車傷足喪屨

左傳嚴公八年

近豕禍也先是齊襄淫于妹魯桓公夫人使公子彭生殺威又殺彭生以謝魯公孫無知有寵於先君襄公紂之無知帥怨恨之徒攻襄于田所襄匿其戶間足見於戶下遂殺之傷足喪屨卒死于足虐急之效也

燕王宮永巷中豕出國壤都竈銜其脯六
七枚置殿前

近豕禍也時燕王旦與長公主左將軍謀爲大
逆誅殺諫者暴急無道竈者生養之本豕而敗
竈陳脯于庭脯竈將不用宮室將廢辱也燕王
不改卒伏其辜

穀洛水鬪將毀王宮

史記魯襄公二十三年

近火沴水也周靈王將擁之有司諫曰不可長
民者不崇穀不墮山不防川不竇澤今吾執政

母乃有所辟而滑夫二川之神使至於爭明以防王宮室王而飾之毋乃不可乎懼及子孫王室愈卑王卒擁之以傳推之以四瀆比諸侯穀洽其次卿大夫之象也爲卿大夫將分爭以危亂王室也是時世卿專權儋括將有篡殺之謀如靈王覺寤匡其失政懼以承戒則災禍除矣不聽諫謀簡嫚大異任其私心塞埤擁下以逆水執而害鬼神後數年有黑如日者五是歲蚤霜靈王崩景王立二年儋括欲殺王而立王弟

佞夫佞夫不知景王并誅佞夫及景王死五大夫爭權或立子猛或立子朝王室大亂

秦武王二年渭水赤者三日昭王三十四年渭水又赤三日

近火沴水也秦連相坐之法棄灰於道者黥罔密而刑虐加以武伐橫出殘賊鄰國至於變亂五行氣色謬亂天戒若曰勿爲刻急將致敗亡秦遂不改至始皇滅六國二世而亡昔三代居三河河洛出圖書秦居渭陽而渭水數赤瑞異

應德之效也

恒風書

於易巽爲風爲木卦在三月四月繼陽而治主木之華實風氣盛至秋冬木復華故有華孽

淮南王都壽春大風毀民室殺人

漢文帝二年

是歲南越反攻淮南邊淮南王長破之後年入朝殺漢故丞相辟陽侯上赦之歸聚姦人謀逆亂自稱東帝見異不寤後遷于蜀道死靡

九月巳卯晦震夷伯之廟

釐公十五年

晦。晦也。震雷也。夷伯。世大夫。正晝雷。其廟獨冥。
天戒若曰。勿使大夫世官。將專事冥晦。明年公
子季友卒。果世官。政在季氏。至成公十六年六
月。甲午晦。正晝皆冥。陰爲陽。臣制君也。成公不
寤。其冬季氏殺公子偃。季氏萌于釐公。大於成
公。此其應也。

郊牛之口傷。吹卜牛牛死。

宣公三年

近牛禍也。是時宣公與公子遂謀共殺子赤而
立。又以喪娶。區霽昏亂。亂成于口。幸有季文子

得免於禍。天猶惡之。生則不饗其祀。死則災燔其廟。

苻昫衍有獻五足牛者

秦孝文王五年

近牛禍也。先是文惠王初都咸陽。廣大宮室。南臨渭。北臨涇。思心失。逆士氣。足者止也。戒秦建止奢泰。將致危亾。秦遂不改。至於離宮三百。復起阿房。未成而亾。

梁孝王田北山有獻牛足上出背上者

景帝

中六年

近牛禍。先是孝王驕奢。起苑方三百里。宮館閣道相連三十餘里。納于邪臣羊勝之計。欲求爲漢嗣。刺殺議臣爰盎。事發。負斧歸死。旣退歸國。猶有恨心。內則思慮霧亂。外則土功過制。故牛禍作。足而出于背。下奸上之象也。猶不能自解。發疾暴死。又凶短之極也。

周景王將鑄無射鐘

昭公二十一年

是時景王好聽淫聲。適庶不明。思心霧亂。明年以心疾崩。近心腹之病。凶短之極者也。

周三川皆震 幽王二年

金木水火沴土者也

三川竭岐山崩

陽失在陰者謂火氣來煎枯水故川竭也。山川連體。下竭上崩。事執然也。時幽王暴虐。妄誅伐。不聽諫。迷於褒姒。廢其正后。廢后之父申侯與犬戎共攻殺幽王。

九月癸酉地震

文公九年

先是時齊桓晉文魯釐二伯賢君新沒。周襄王

失道楚穆王殺父諸侯皆不肖權傾於下天戒
若曰臣下彊盛者將動爲害後宋魯晉莒鄭陳
齊皆殺君

五月甲子地震

襄公十六年

先是雞澤之會諸侯盟大夫又盟是歲三月諸
侯爲淝梁之會而大夫獨相與盟五月地震矣
其後崔氏專齊欒盈亂晉良霄傾鄭閭殺吳子
燕逐其君楚滅陳蔡

五月己卯地震

昭公十九年

是時季氏將有逐君之變其後宋三臣曹會皆以地叛蔡莒逐其君吳敗中國殺二君

八月乙未地震

昭公二十三年

是時周景王崩劉單立王子猛尹氏立子朝其後季氏逐昭公黑肱叛邾吳殺其君僚宋五大夫晉二大夫皆以地叛

四月甲午地震

哀公三年

是時諸侯皆信邪臣莫能用仲尼盜殺蔡侯齊陳乞弑君

沙麓崩

釐公十四年

臣下背叛。散落不事上之象也。先是齊桓行伯道。會諸侯事周室。管仲既死。桓德日衰。天戒若曰。伯道將廢。諸侯散落。政逮大夫。陪臣執命。臣下不事上矣。桓公不寤。天子蔽晦。及齊威死。天下散而從楚。王札子殺二大夫。晉敗天子之師。莫能征討。從是陵遲。

夏梁山崩。穀梁傳曰。靡河三日不流。晉君

帥羣臣而哭之。廼流

成公五年

山陽君也。水陰民也。天戒若曰。君道崩壞。下亂百姓。將失其所矣。哭然後流。喪亾象也。梁山在晉地。自晉始。而及天下也。後晉暴殺三卿。厲公以弑。湟梁之會。天下大夫皆執國政。其後孫甯出衛獻。三家逐魯昭。單尹亂王室。

齊楚地山二十九所。同日俱大發水潰出。

文
帝
元
年

近水沴土也。天戒若曰。勿盛齊楚之君。今失制度。將爲亂。後十六年。帝庶兄齊悼惠王之孫文

王則薨無子帝分齊地立悼惠王庶子六人皆
爲王賈誼鼂錯諫以爲違古制恐爲亂至景帝
三年齊楚七國起兵百餘萬漢皆破之春秋四
國同日災漢七國同日衆山潰咸被其害不畏
天威之明效也

山崩靡江江水逆流三日廼通

成帝河平三年

周時岐山崩三川竭而幽王亡岐山者周所興
也漢家本起於蜀漢今所起之地山崩川竭星
孛又及攝提大角從參至辰殆必亡矣其後三

世亾嗣王莽篡位

秋有蜮

嚴公十八年

蜮生南越。越地多婦人。男女同川。淫女爲主。亂氣所生。故聖人名之曰蜮。蜮猶惑也。在水旁能射人。射人有處。甚者至死。南方謂之短弧。近射妖。死亾之象也。時嚴將取齊之淫女。故蜮至天。戒若曰。勿娶齊女。將生淫惑篡弑之禍。嚴不寤。遂取之。入後淫于二叔。二叔以死。兩子見弑。夫人亦誅。

魯哀公時有隼集于陳廷而死。楷矢貫之。

石罫長尺有咫。

隼近黑祥。貪暴類也。矢貫之。近射妖也。死于廷。國亾表也。象陳眚亂。不服事周。而行貪暴。將致遠夷之禍。爲所滅也。是時中國齊晉南夷吳楚爲彊。陳交晉不親。附楚不固。數被二國之禍。後楚有白公之亂。陳乘而侵之。卒爲楚所滅。

褒姒滅周

夏后季世。周之幽厲皆諄亂逆天。故有龍馭之

怪。近龍蛇孽也。殽血也。一曰沫也。殽弧。桑弓也。其服蓋以其草爲箭服。近射妖也。女童。咎者禍將生於女國。以兵寇亾也。

龍鬪於鄭時門之外洧淵

左傳昭公十九年

近龍孽也。鄭以小國攝乎晉楚之間。重以彊吳。鄭當其衝。不能修德。將鬪三國。以自危亾。是時子產任政。內惠於民。外善辭令。以交三國。鄭卒亾患。能以德消變之效也。

正月癸酉旦有兩龍見於蘭陵廷東里溫

陵井中至乙亥夜去

惠帝二年

龍貴象。而困於庶人井中。象諸侯將有幽執之禍。其後呂太后幽殺三趙王。諸呂亦終誅滅。

魯嚴公時有內蛇與外蛇鬪。鄭南門中內

蛇死

近蛇孽也。先是鄭厲公劫相祭仲而逐兄昭公。代立。後厲公出奔。昭公復入死。弟子儀代立。厲公自外劫大夫傅瑕使僇子儀。此外蛇殺內蛇之象也。蛇死六年而厲公立。

有蛇自泉宮出入于國如先君之數

左傳文公

十六年

近蛇孽也。泉宮在園中。公母姜氏嘗居之。蛇從之出。象宮將不居也。詩曰。維虺維蛇。女子之祥。又蛇入國。國將有女憂也。如先君之數者。公母將薨。象也。秋。公母薨。公惡之。乃毀泉臺。夫妖孽應行而自見。非見而爲害也。文不改行循正。其御厥罰。而作非禮。以重其過。後二年薨。公子遂殺文之二子惡視而立宣公。文公夫人大歸于

齊

秦孝公二十一年有馬生人昭王二十年

牡馬生子而死

史記

皆馬禍也。孝公始用商君攻守之法。東侵諸侯。至於昭王。用兵彌烈。其象將以兵革抗極。成功而還。自害也。牡馬非生類。妄生而死。猶人恃力彊得天下。而還自滅之象也。

有馬生角于吳角在耳前上鄉右角長三

寸左角長二寸皆大二寸

文帝十二年

馬不當生角。猶吳不當舉兵鄉上也。是時吳王
濞封有四郡五十餘城。內懷驕恣。變見於外。天
戒早矣。王不寤。後卒舉兵誅滅。

文公十一年敗狄于鹹。穀梁公羊傳曰。長
狄兄弟三人。一者之魯。一者之齊。一者之
晉。皆殺之。身橫九晦。

是時周室衰微。三國爲大。可責者也。天戒若曰。
不行禮義。大爲夷狄之行。將至危亡。其後三國
皆有篡弑之禍。近下人伐上之病也。

十月朔日有蝕之

桓公十七年

是時衛侯朔有罪出奔齊。天子更立衛君。朔藉助五國。舉兵伐之而自立。王命遂壞魯夫人淫矢于齊。卒殺威公。

三月日有食之

嚴公十八年

夜食者。陰因日明之衰而奪其光。象周天子不明。齊桓將奪其威。專會諸侯而行伯道。其後遂九合諸侯。天子使世子會之。此其效也。

十二月癸亥朔日有食之

嚴公二十六年

時戎侵曹。魯夫人淫于慶父。叔牙將以弑君。故
比年再蝕。以見戒。

五月日有食之

僖公十五年

象晉文公將行伯道。後遂伐衛。執曹伯。敗楚城
濮。再會諸侯。召天王而朝之。此其效也。日食者
臣之惡也。夜食者掩其罪也。以爲上亾明王。桓
文能行伯道。攘夷狄。安中國。雖不正。猶可。蓋春
秋實與而文不與之義也。

十二月朔日有食之

襄公二十七年

自二十年至此歲八年間日食七作禍亂將重
起故天仍見戒也後齊崔杼弑君宋殺世子北
燕伯出奔鄭大夫自外入而篡位

五月乙未朔日有食之

昭公二十四年

自十五年至此歲十年間天戒七見人君猶不
寤後楚殺戎蠻子晉滅陸渾戎盜殺衛侯兄蔡
莒之君出奔吳滅巢公子光殺王僚宋三臣以
邑叛其君

十二月辛亥朔日有食之

昭公三十一年

時吳滅徐而蔡滅沈楚圍蔡吳敗楚入郢昭王走出

八月庚辰朔日有食之

定公十五年

盜殺蔡侯齊陳乞弑其君而立陽生孔子終不用

五月丁卯先晦一日日有食之幾盡在七

星初

惠帝七年

五月微陰始起而犯至陽其占重至其八月宮車晏駕有呂氏詐置嗣君之害

二月丙戌朔日有食之在奎十四度

武帝建元

二年

奎爲卑賤婦人。後有衛皇后自至微興卒有不終之害。

二月丙辰晦日有食之七月癸未先晦一

日日有食之在翼八度

武帝元光元年

前年高園便殿災與春秋御廩災後日食於翼軫同其占內有女變外爲諸侯其後陳皇后廢江都淮南衡山王謀反誅日中時食從東北過

半晡時復

七月己亥晦日有食之幾盡在張十二度

元鳳元年

己亥而既其占重後六年宮車晏駕卒以亾嗣

四月己亥晦日有食之不盡如鉤在東井

六度成帝和平元年

其占恐害繼嗣日蚤食時從西南起

八月戊午晨漏未盡三刻有兩月重見成帝

建始元年

眇者疾也。君舒緩則臣驕慢。故日行遲而月行疾也。仄匿者不進之意。君肅急則臣恐懼。故日行疾而月行遲。不敢迫近君也。不舒不急以正失之者。食朔日。

四月辛卯夜恒星不見夜中星隕如雨

嚴公

七年

夜中者言不得終性命。中道敗也。

七月有星孛入于北斗

文公十四年

君臣亂於朝。政令虧於外。則上濁三光之精五

星羸縮。變色逆行。甚則爲孛。北斗人君象。孛星
亂臣類。篡殺之表也。星傳曰。魁者貴人之牢。又
曰。孛星見北斗中。大臣諸侯有受誅者。一曰魁
爲齊晉。夫彗星較然在北斗中。天之視人顯矣。
史之有占明矣。時君終不改寤。是後宋魯莒晉
鄭陳六國咸弑其君。齊再弑焉。中國旣亂。夷狄
竝侵。兵革從橫。楚乘威席勝。深入諸夏。六侵伐。
一滅國。觀兵周室。晉外滅二國。內敗王師。又連
三國之兵。大敗齊師于鞏。追亡逐北。東臨海水。

威陵京師。武折大齊。皆孛星災之所及。流至二十八年。星傳又曰。彗星入北斗。有大戰。其流入北斗中。得名人。不入失名人。宋華元賢名大夫。大棘之戰。華元獲于鄭。傳舉其效云。

冬有星孛于大辰

昭公十七年

星傳曰。心大星。天王也。其前星。太子。後星。庶子也。尾爲君。臣垂離。孛星加心象。天子適庶將分爭也。其在諸侯。角亢氏陳鄭也。房心宋也。後五年。周景王崩。王室亂。大夫劉子單子立王猛。尹

氏召伯毛伯立子鼂，子鼂，楚出也。時楚彊，宋衛陳鄭皆南附楚。王猛既卒，敬王卽位，子鼂入王城。天王居狄泉，莫之敢納。五年，楚平王居卒，子鼂奔楚。王室乃定。後楚帥六國伐吳，吳敗之于雞父，殺獲其君臣，蔡怨楚而滅沈。楚怒，圍蔡。吳人救之，遂爲柏舉之戰，敗楚師，屠郢都，妻昭王母，鞭平王墓。此皆孛彗流災所及之效也。

七月有星孛于大角，旬餘乃入。高帝三年

是時項羽爲楚王，伯諸侯而漢已定三秦，與項

羽相距滎陽，天下歸心於漢。楚將滅，故彗除王位也。

九月有星孛於西方，其本直尾箕末指虛。

危長丈餘，及天漢十六日不見。

文帝後七年

尾宋地，今楚彭城也。箕爲燕，又爲吳越。齊宿在漢中，負海之國，水澤地也。是時景帝新立，信用鼂錯，將誅正諸侯王，其象先見。後三年，吳楚四齊與趙七國舉兵反，皆誅滅云。

六月有星孛于北方。

武帝建元六年

明年淮南王安入朝與太尉武安侯田蚡有邪謀而陳皇后驕恣其後陳后廢而淮南王反誅

正月有星孛于西方去太白二丈所

宣帝地節

元年

太白爲大將彗孛加之掃滅象也明年大將軍霍光薨後二年家夷滅

正月有星孛于營室青白色長六七丈廣

尺餘

成帝建始元年

營室爲後宮懷妊之象彗星加之將有害懷妊

絕繼嗣者

七月辛未。有星孛于東井。

成帝元延元年

三代之亾。攝提易方。秦項之滅。星孛大角。

本傳

向字子政，本名更生，年十二，以父德任爲輦郎。旣冠，以行修，飭擢爲諫大夫。是時先帝循武帝故事，招選名儒俊材置左右。更生以通達能屬文辭，與王褒、張子僑等竝進對，獻賦頌凡數十篇。上復興神僊方術之事，而淮南有枕中鴻寶、苑秘書，書言神僊使鬼物爲金之術，及鄒衍重道延命方，世人莫見，而更生父德武帝時治淮南獄，得其書，更生幼而讀誦，以爲奇，獻之言黃

金可成上令典尚方鑄作事費甚多方不驗上
乃下更生吏吏劾更生鑄僞黃金繫當死更生
兄陽城侯安民上書入國戶半贖更生罪上亦
奇其材得踰冬減死論會初立穀梁春秋徵更
生受穀梁講論五經於石渠復拜爲郎中給事
黃門遷散騎諫大夫給事中元帝初卽位太傅
蕭望之爲前將軍少傅周堪爲諸吏光祿大夫
皆領尚書事甚見尊任更生年少於望之堪然
二人重之薦更生宗室忠直明經有行擢爲散

騎宗正給事中與侍中金敞拾遺於左右四人同心輔政患苦外戚許史在位放縱而中書宦官弘恭石顯弄權望之堪更生議欲白罷退之未白而語泄遂爲許史及恭顯所譖愬堪更生下獄及望之皆免官語在望之傳其春地震夏客星見昴卷舌間上感悟下詔賜望之爵關內侯奉朝請秋徵堪向欲以爲諫大夫恭顯白皆爲中郎冬地復震時恭顯許史子弟侍中諸曹皆側目於望之等更生懼焉乃使其外親上變

事書奏恭顯疑其更生所爲白請考姦詐辭果
服遂逮更生繫獄下太傅韋玄成諫大夫貢禹
與廷尉雜考劾更生前爲九卿坐與望之堪謀
排車駕將軍高許史氏侍中者毀離親戚欲退
去之而獨專權爲臣不忠幸不伏誅復蒙恩徵
用不悔前過而教令人言變事誣罔不道更生
坐免爲庶人而望之亦坐使子上書自寃前事
恭顯白令詣獄置對望之自殺天子甚悼恨之
廼擢周堪爲光祿勳堪弟子張猛光祿大夫給

事中、大見信任、恭顯憚之、數譖毀焉、更生見堪
猛在位、幾已得復進、懼其傾危、廼上封事、恭顯
見其書、愈與許史比、而怨更生等、堪性公方、自
見孤立、遂直道而不曲、是歲夏、寒日青、無光、恭
顯及許史皆言、堪猛用事之咎、上內重堪、又患
衆口之寢潤、無所取信、時長安令楊興以材能
幸、常稱譽堪、上欲以爲助、廼見問興、朝臣斷斷
不可、光祿勲何耶興者、傾巧士、謂上疑堪、因順
指曰、堪非獨不可於朝廷、自州里亦不可也、臣

見衆人聞堪前與劉更生等謀毀骨肉，以爲當誅。故臣前言堪不可誅傷，爲國養恩也。上曰：然此何罪而誅？今宜柰何？興曰：臣愚以爲可賜爵關內侯，食邑三百戶，勿令典事，明主不失師傅之恩。此最策之得者也。上於是疑會城門校尉諸葛豐，亦言堪猛短，上因發怒，免豐。語在其傳。又曰：豐言堪猛貞，信不立。朕閔而不治。又惜其材能，未有所效。其左遷堪爲河東太守，猛槐里令，顯等專權日甚。後三歲餘，孝宣廟闕災，其晦

日有蝕之。於是上召諸前言日變在堪猛者責問。皆稽首謝。乃因下詔曰。河東太守堪。先帝賢之。命而傳朕。資質淑茂。道術通明。論議正直。秉心有常。發憤悃悃。信有憂國之心。以不能阿尊事貴。孤特寡助。抑厭遂退。卒不克明。往者衆臣見異。不務自脩。深惟其故。而反掩昧。說天託咎此人。朕不得已出而試之。以彰其材。堪出之後。大變仍臻。衆亦默然。堪治未期年。而三老官屬有識之士。味頌其美。使者過郡。靡人不稱。此固

足以彰先帝之知人。而朕有以自明也。俗人廼造端作基。非議詆欺。或引幽隱。非所宜明。意疑以類。欲以陷之。朕亦不取也。朕迫於俗。不得專心。廼者天著大異。朕甚懼焉。今堪年衰歲暮。恐不得自信。排於異人。將安究之哉。其徵堪詣行在所。拜爲光祿大夫。秩中二千石。領尚書事。猛復爲太中大夫。給事中。顯幹尚書。尚書五人皆其黨也。堪希得見。常因顯白事。事決顯口。會堪疾瘖。不能言。而卒顯誣譖猛。令自殺於公車。更

生傷之、廼著疾、讒、擿、要、救、危、及、世、頌、凡、八、篇、依、興、古、事、悼、已、及、同、類、也、遂、廢、十、餘、年、成、帝、卽、位、顯、等、伏、辜、更、生、乃、復、進、用、更、名、向、向、以、故、九、卿、召、拜、爲、中、郎、使、領、護、三、輔、都、水、數、奏、封、事、遷、光、祿、大、夫、是、時、帝、元、舅、陽、平、侯、王、鳳、爲、大、將、軍、秉、政、倚、太、后、專、國、權、兄、弟、七、人、皆、封、爲、列、侯、時、數、有、大、異、向、以、爲、外、戚、貴、盛、鳳、兄、弟、用、事、之、咎、而、上、方、精、於、詩、書、觀、古、文、詔、向、領、校、中、五、經、祕、書、向、見、尚、書、洪、範、箕、子、爲、武、王、陳、五、行、陰、陽、休、咎、

之應向乃集合上古以來、歷春秋六國、至秦漢
符瑞災異之記、推迹行事、連傳禍福、著其占驗、
比類相從、各有條目、凡十一篇、號曰洪範五行
傳論。奏之天子、心知向忠精、故爲鳳兄弟起此
論也。然終不能奪王氏權。久之、營起昌陵、數年
不成、復還歸延陵。制度泰奢、向上疏諫、書奏上
甚感向言、而不能從其計。向睹俗彌奢淫、而趙
魏之屬、起微賤、踰禮制、向以爲王教隳內及外、
自近者始。故採取詩書所載、賢妃貞婦、興國顯

家可法則、及孽嬖亂亡者、序次爲列女傳、凡八篇、以戒天子、及采傳記行事、著新序說苑、凡五十篇奏之、數上疏言得失、陳法戒、書數十上、以助觀覽、補遺闕、上雖不能盡用、然內嘉其言、常嗟歎之、時上無繼嗣、政由王氏出、災異浸甚、向雅奇陳湯智謀、與相親友、獨謂湯曰、災異如此、而外家日盛、其漸必危劉氏、吾幸得同姓末屬、纍世蒙漢厚恩、身爲宗室遺老、厯事三主、上以我先帝舊臣、每進見、常加優禮、吾而不言、孰當

言者向遂上封事極諫書奏天子召見向歎息
悲傷其意謂曰君且休矣吾將思之以向爲中
壘校尉向爲人簡易無威儀廉靖樂道不交接
世俗專積思於經術晝誦書傳夜觀星宿或不
寤達旦元延中星孛東井蜀郡岷山崩壅江向
惡此異語在五行志懷不能已復上奏上輒入
之然終不能用也向每召見數言公族者國之
枝葉枝葉落則本根無所庇陰方今同姓疏遠
母黨專政祿去公室權在外家非所以疆漢宗

卑私門、保守社稷、安固後嗣也。向自見得信于上、故常顯訟宗室、譏刺王氏。及在位大臣、其言多痛切、發於至誠。上數欲用向爲九卿、輒不爲王氏居位者。及丞相御史所持、故終不遷。居列大夫官。前後三十餘年。年七十二卒。卒後十三歲而王氏代漢。向三子皆好學。長子伋、以易教授官。至郡守。中子賜、九卿丞。蚤卒。少子歆、最知名。

劉子政集終

隆平如鼎然

平如鼎然

平如鼎然

平如鼎然

平如鼎然

平如鼎然

平如鼎然

平如鼎然

平如鼎然



